

新分類尺牘  
大全

各界適用

丁巳夏月

君宜題

新分類尺牘大全總目

政界

一至二百二十九

學界

一至九十五

商界

一至一百三十六

農工界

一至四十三

女界

一至八十七

普通社會界

一至一百八十三

●外編

尺牘擷錦

一至六十七

尺牘典故韻註

一至三十六

尺牘稱謂

一至十

尺牘套語

一至十四

# 新分類尺牘大全

農工界

## ●農業概要

○家書述告農業學校之詳情

某兄如晤。頃奉

手示。欣悉。

庭闈康健。闔家均安。至以爲慰。弟自上月入校以來。每日必須按時至試驗場。實地練習農事。該試驗場約有二十餘畝。以荳棉稻三種爲主要。種植物分教師種植區。

學生種植區。場中止有農夫一人。以任雜作。其餘各種農事。均由學生實習。校中於作物書產病書肥料園藝等項。亦均注重於教室之作業。各有成績。據說放暑假時。尚留二十餘生在校。一律農衣農褲。短袖赤足。踞地磨治鋤鏟等農器。至入田練習一切工作。概與農人無異。云弟平日習慣農事。不但易見進步。且較可耐勞。諸祈

放懷是禱。手此敬請

侍安。

弟某某謹啓

月

日

○覆言舊農國變爲新農國之希望

某弟如握。昨晚由某某交到

手書。知吾

弟近日在校。實習農業學科。頗增進步。甚慰甚慰。惟

來函輒言中國爲舊農國。似有自視鄙薄之意。兄竊爲不  
取。蓋我國爲全球唯一之大陸地。農業開化最早。故至  
今猶號稱農務國。其實人工代價之廉。勞動能力之強。  
有非各國所可及者。誠能拓殖邊荒。改善蠶桑。精究棉  
植。廣造森林。力籌漁牧。舉全國而一致銳進。則指日富  
強。不難使舊農國一變而爲新農國。惟此之希望。仍屬  
諸汝等之農校學生也。尙希吾

弟力自勉之是幸。專此順問。

近佳。

兄某某手啓

月

日

○請代徵求蟲菌以爲禾穀除害之研究

某某先生台鑒。敬啓者。蟲災菌病。爲禍最烈。歐美各國。因之歲損金錢。以億兆計。彼土科學發達。防患之方。講求周備。受患之鉅。尙至如此。我國農界。智識淺薄。防患無術。每歲所受蟲菌之損失。當更無量數可言。弟校同人。怒焉憫之。特請本校教員某某兩先生。主任研究禾穀上。一切蟲菌。以籌驅除之方法。緣此敢乞。

執事代爲徵求

貴地爲害之蟲或菌。及所害之植物。包封附以一信。詳細說明其爲害情形。交郵寄下。至爲盼禱。想執事素稱賢勞於社會。當不以瑣瀆見却也。專此奉託。祇頌

鈞祺。

弟某某謹啓

月

日

○函告慎重水利爲農田之必要

某某仁兄閣下。久未得

書。良殷企念。比維

興居晉吉。

潭第咸綏。爲頌爲慰。茲啓者。慎重水利。爲農田之必要。我



鄉重要河流。淤塞過半。若不及時興修。旱潦無備。於農業前途。關係至鉅。現值春水未漲。淺灘灣曲。易於察勘。弟特請水利委員會。着派技士某君。前往我鄉。測量查勘。以爲施工之張本。倘某技士到時。務望

執事優禮接待。并祈

贊同辦理。是所至禱。專此奉布。卽請

台安。

弟某某謹啓

月

日

○函述廣開牧場之意見

某某仁兄惠鑒。日前趨候未晤。至以爲悵。茲聞歐洲交戰。各國需用之牛羊猪各肉品。日形缺乏。現多仰給於他國。

卽將來和議告成。其牧業非一時可恢復。則肉品必仍難自給。弟思我鄉草料豐富。畜牧最易。若能及此時期。廣開牧場。備有大宗肉品。輸出以供其求。預料獲利必豐。當不令陶朱公專美於前也。吾

兄倘若有意於此。望卽

代邀某某兩君一敘。以便商定完善辦法。是禱。專此布意。

祇頌

台祉。

弟某某謹啓

月

日

○與友言破天荒之改良畜牧

某某仁兄左右。關別

光儀。良殷馳系辰維。

起居迪吉爲頌。弟在此擔任某某農業學校職務。尙稱平妥。惟地方風氣未開。一般農界對於牧養前途。仍多漠視。現在第三種畜牧試驗場業已設立。場長某君以提倡畜牧。開闢利源爲己任。特從西洋購來哈利佛種牛。美利奴種羊。一面由該場試驗中外牛羊交配。改良滋生種畜。以備將來各地購買。一面預備附近鄉民有養牛羊者。可將牛羊運送該場。與外國牛羊交配改良。成一種最好之牲畜。此等增加土產方法。眞可謂破天荒之事業也。我鄉畜牧試驗場。上年曾聞有創辦之說。目

下是否成立。尙希吾

兄便中

詳示情形是禱。專此順請

近安。

弟某某謹啓

月 日

○函述棉業之成績并寄棉種

某某仁兄大鑒。昨由郵局送到某日

惠書承

囑索取南通棉種。具見

足下增進土產。開闢利源之盛意。至爲忻忭。蓋現今我國之農界。除蠶桑外。惟植棉一項。尙稱出產豐富。足與各

國相競爭。故南通張齋老。盡十餘年之心力。研究棉業。其成績遂愈演而愈優。其利益乃日擴而日溥。所備棉種。具有說明書。名目雖夥。類別甚詳。前茲曾託友人。索得其最佳者五六種。今特分出一半。包封寄呈。至祈查收爲盼。手此順頌。

台祉。

弟某某某謹啓

月 日

○與友言養蠶模範場之計畫

某某仁兄閣下。暌別以來。雖函札往還。終以不得面承。

教益爲悵。比論

履候安和。

公私順利。爲頌爲慰。茲啓者。弟現由縣署委辦養蠶場事。深恐無米爲炊。必多棘手。乃查有某鄉某君某某。講究蠶桑利益。業已多年。舊栽桑樹。不下十餘萬株。墜植剪裁。頗著功效。並有完善養蠶房屋。器具俱全。歷年養蠶。尙稱得法。弟因與某君接洽。商定辦法。推渠爲養蠶模範場場長。卽假其原有場所。爲我邑模範之地。各事均已就緒。惟開辦伊始。仍宜取法改良。聞

貴處素精蠶桑事業。務乞

閣下調取各種成績。可資研究者。交郵寄下。俾得藉以講求。無任感荷。專此奉懇。卽請

台安。

弟某某謹啓

月

日

○函商整頓蠶桑之要略

某某仁兄左右。久違

教益。時切懷思。比維

興居健勝爲頌。茲因我鄉蠶桑日就頹衰。將有一落千丈之勢。弟現略擬補救方法。大要有三。一曰繭種不良。宜改換各蠶桑學校所收繭種。成效卓著者。凡有一切劣種。概不得留養。以免害羣。二曰留心飼養。現在各家養蠶。貪多。既苦人工之不敷。而桑葉缺乏。食不依時。故繭多薄劣。此等習慣。亟宜誠除。三曰改換桑樹。蠶恃桑葉

爲肥養料。多年桑樹。葉薄且小。肥料不足。必須剷除。已荒之老葉。爲必要。上列各端。倘

執事許爲同意。希卽招集地方各代表。協議進行。是所至禱。專此卽請

近安。

弟某某謹啓

月

日

○函述花朝日植樹典禮之盛況

某某仁兄左右。日昨

台從枉顧。失迓爲罪。因弟適往造林場。觀行植樹典禮也。弟始至該場時。略視其籌備之苗圃。畫分之林區。搜羅之木本。誠爲前茲所未見。已而政學紳商軍警各界。相



繼齊至。遂分定地段。各植紀念樹。并由某君作露天演說。謂植樹可以增進歲入。調和旱澇。補助衛生。點綴風景。且喻言民國成立。如樹之既植。必期其發榮滋長。日益蓬勃云云。一時觀禮者拍掌之聲。震動林場。弟此行頗覺有特別之樂趣。用特述告大略。以當面談。專此即頌。

台社。

弟某某謹啓

月

日

○函詢造林之植品

某某仁兄惠覽。久不晤談。想

動定安佳爲慰。茲啓者。弟上年購置某處之山地約有二

百餘畝。現擬及時造林。以謀利益。惟木植中如松如杉如柏如竹如茶。以及各種菓品。名目甚繁。究以何者爲最宜。一時無從別擇。因思

閣下素嫻林業。經驗足資。務乞

詳明指示。以便遵行。倘荷

台駕惠臨。得偕前往實勘。尤所幸感。專此布意。祇請

近安。

弟某某謹啓

月

日

○覆言墾殖滿蒙之利益

某某仁兄惠鑒。昨奉

手書。以墾殖滿蒙之事。下

詢。弟上年嘗調查其地。所行之農業制度。計有分益租田。自耕之三種。既耕地中。以採分益制度者爲最多。約十分之六。租田制度。十分之三。自耕制度最少。約十分之一。其中分益制度。則地主須供給必要品於農夫。租田制度。則一切均由農夫擔任之。總之滿蒙土地之經營。利益至多。地價之低廉。一也。未耕地甚多。二也。收益之豐厚。三也。我

兄果注意及之。尙希及早實行是幸。此復。祇頌

近祉。

弟某某謹啓

月

日

○致友論殖業改進之方法

某某仁兄惠鑒。昨奉

手教。論及近今農界退化之現狀。至可慨歎。然弟謂實有不能盡責之農界者。蓋中國農業。夙稱發達。相土辦種之法。林衡畜牧之規。散見古書。班班可考。降及今茲。農智日湮。習守故常。鮮知改進。雖政府鑒於殖業之寢衰。生產之奇絀。亟亟勸誘人民。應用新法。而農業林業棉業各種。仍無良善之成績可言。究厥原因。實由良法未盡周知。成效未經目睹之故。此時欲使農界銳意進行。仍不外由各地各校學生。實習農業。俾得并力協助。一致專營。或可廣農學傳習之途。而易收農事進益之效。

也。愚見如此。

執事以爲然否。此復。祇頌

台祉。

弟某某謹啓

月 日

○函詢農部振興漁業之確情

某某先生左右。謹啓者。吾國海線。南至瓊粵。北極遼渤。綿互幾及萬里。海產夥賾。加以江湖河港。源流歧錯。淡水生物。尤稱繁富。通商以後。沿海各省水產品。尙有販運出口。乃年來漁業日衰。不但輸出漸減。而吾國民魚食之品。且多仰給於外貨。言之誠足滋戚。茲聞農部有振興漁業。設法整頓之說。尙祈

閣下探其確實情形。

詳明示我是盼。專此奉布。祇頌

近祉。

弟某某謹啓

月

日

○與友言改良製靛并寄贈洋靛種子

某某仁兄台鑒。日昨接奉

來書承

詢洋靛與本靛之比較。其優異之點。約有三項。本靛並無  
子種。每屆收割時。須先留根莖。作為下年之種。而收藏  
頗屬不易。洋靛則有子可收。收藏既便。播種亦易。此優  
點一。種植本靛。必須極肥之土。方易滋長。且施用肥料。

必須豈餅等物。工本頗鉅。洋靛即播種於礮瘠之地。亦能茂盛。此優點二。釀製本靛。須先築極大之靛池。且製煉時手續頗繁。時日尤多。洋靛則自收割後。約三四日。即得製成完全之靛青。此優點三。至若釀製合法。其藍色之鮮豔。較本靛尤高出數倍。價格亦較爲昂貴也。茲特附寄洋靛種子一盒。至祈

檢收爲荷。專復。祇頌

近祉。

弟某某謹啓

月

日

○函索各色菜種

某某仁兄台鑒。逕啓者。近聞農業學科。日益競進。弟不覺技

癢將屋後荒地畝許。闢爲蔬圃。以供農家不時之需。惟地力雖已無遺。而佳種實爲難得。因憶前見兄處東畦。備有長柄寒匏。速珠細菌之各品。偷荷分惠。

賜以各色種子。俾得按時而佈種之。庶幾開軒塲圃。不斷生機。遠市盤殮。得有兼味。蓋不僅作一幅畫圖觀也。專此奉懇。祇頌。

近祉。

弟某某謹啓

月

日

## ●工業概要

○家報言職工爲社會上生利之人



某兄如見。握別以來。無時不念。遙想

嚴慈以次。一是康寧。爲祝。昨日某某自鄉間來。述及吾

兄常以弟在外充任職工。爲苦。殊不知弟甚以爲樂也。何則。我人當此青年時代。能擅有專門工藝。則爲社會上生利之人。不但衣食住三項。均足取資於工業。而無慮。且技能力求其精良。智識日進於優美。即可自圖獨立之恆產。博得營業之資金。蓋雖曰區區一工人。其前途之希望。實有未可限量者。弟一念及此。正覺樂而不疲。更何苦之何云。尙望吾

兄格外放懷。是禱。手此敬請

侍安。

弟某某謹啓

月

日

○函陳工黨之主旨

某某仁兄惠鑒。昨奉

手教。辱荷

注存。無任感愧。弟近投身工黨。擬爲全國工界。聯絡感情。并爲各個勞動者。謀自身之活動。務使全國工業。一律平等。痛革賤工之積習。促進物質之文明。將來達到目的。非特資本案受其益。卽國家之平治富強。亦胥於是賴。想吾

兄素抱民生主義。對於此舉。諒有

同情。用特附呈本黨章程百份。乞卽代爲傳佈。爲禱。專此敬請。

台祉。

弟某某謹啓

月

日

○與友言工業爲民生之要素

某某仁兄台鑒。昨晤某君某某。述及

足下現方研求工業專門之效用。甚善甚善。弟實謂工業爲民生之要素。必須得多數優秀份子。提倡而誘導之。始可冀國民生計前途。一放其光彩。况自光復以來。立國五稔。革政者三。工界已屢受影響。不及此時。力圖補救。恐社會事業。日益彫敝。而未來之險象。將不可勝言。

今吾

兄竭精殫慮。講究工科。想對於民生問題。必有見解獨到者。尙望便中

賜以教言。是盼。專此奉布。祇頌

近祉。

弟某某謹啓

月

日

○與友言機械工藝與化學工藝之意義

某某仁兄惠鑒。奉

示敬悉。承

詢機械工藝與化學工藝之意義。今略言之。蓋由天然原料或人工原料之形性變化。造成有用之物體。而爲營

利的事業者。曰製造工業。製造工業有單自機械作用而成者。例如鉛塊作鉛管。鐵板造汽罐。纖維之製絲。絲之爲織物等。皆從物理學原理而行。材料之組織及變形。是曰機械工藝。其專依化學方法變化其原料之性質。或精製之而爲有價值之物者。例如銑之爲養化銑。硫黃之爲硫酸。煤黑油之製色素。油脂之作肥皂。小粉之爲糖爲酒等。皆基於化學原理者也。是曰化學工藝。弟之所知者如此。尙希

另質高明是幸。專此奉復。卽頌

台祉。

弟某某謹啓

月

日

○函告工校自設工廠以實習職業

某某先生惠鑒。頃奉

手教。詢及敝校之情狀。感甚。現在敝校已遵章改組。自設工廠。其設備佈置。一照普通工廠辦理。除通習科日及必須在教室內講授之學科外。即就工場施教。實地工作。以資練習。其金工、木工、染織、密業、漆工、籐竹諸科。所製貨品。則須體察地方情形。期以適用力求改良。製成之品。即由本校售賣。除開支原料品具雜費外。所有餘利。亦照普通工廠之例。以一部分作為職員職工紅利。或獎勵。其餘即為本校擴充設備之用。如此實事求是。

庶學生既可養成實地工作及營業之經驗。而工校作業試驗亦不至徒歸消耗也。此復順頌

台祉。

弟某某謹啓

月

日

○函述對外對內亟須促進工業之二大理由

某某仁兄台鑒。頃奉

手教。似以弟近今勞心於工業上爲疑。豈知弟現退而在野。必須奔走經營於工業者。實具有二大理由。一則因將來歐戰告終。列強以商業恢復其國力。而當此經濟侵略。潮流澎湃之衝者。實爲吾國。此就防列強商戰逆襲之勢力設想。而不得不於工業上急圖促進者。一則

因近年匪患蜂起。幾於徧地良由。生計艱貧。民衆迫於飢寒。而然。故治匪之本。在於治貧。治貧之術。舍推廣工業。其安歸。此就平治內患之政策。設想。而不得不於工業上。急圖促進者。語云。人無遠慮。必有近憂。弟爲工業計。卽爲對外對內計。吾

兄以爲然否。專此順頌。

籌祺。

弟某某謹啓

月 日

○函答舉辦各種小工業不慮技術資本之缺乏  
某某先生大鑒。頃奉

教言。謂吾國徒有善工與原料。而技術資本。二者皆缺。實



爲最大之難端。誠是誠是。雖然。工業與技術相輔而進。未有工業不盛。而能多出工業人材者。至於資金缺乏問題。係指大企業而言。若吾國所尤急者。在舉辦各種小工業。與舊有之工業。良改而擴充之。以其易舉且易普遍也。俟小工業漸盛。人材亦漸多。使工業常識普及於社會。一般人對於各種工業之緩急。與其利益之大小。皆能知其崖略。斯富有資金者。將皆出其窖藏。投之實業。則利大而關係重要之大企業。自能順勢而興舉及之。如此按步進行。猶慮技術資本之缺乏。弟殊不信矣。此復。祇頌。

台社。

弟某某謹啓

月

日

○函言工戰時代當多立工業專門學校

某某先生閣下久別

光儀曷勝渴企比想

動定清娛。

公私順利。至以爲頌。弟自上年經營實業以來。頗覺增有進步。惟念當此工戰時代。視國勢者每以工業學校之多寡。爲測定其國家貧富強弱之尺度。乃我鄉素稱富庶之區。并一工業專門學校而無之。豈非實業界之一大憾事。因思

執事係我鄉之大企業家。久爲各界所推重。務乞代表工界。倡設工業專門學校。以引動社會事業之先機。

倘蒙

許有同情。弟當力效奔走於

左右也。專此布臆。祇請

籌安。

弟某某謹啓

日

月

○函商限制原料輸出以供工業之需用

某某先生賜鑒。逕啓者。我省土絲用途。爲勞動生活所依賴者甚廣。倘若聽任此項原料。盡數輸出。不但反爲舶來品之媒介。且原料由此日缺。製造品由此日少。其遏絕

吾國工人之生計者。爲害實不可勝言。緣此上懇  
台端。速行開會提議。妥籌對付方法。以限制原料輸出。而  
供工業之需用。無任盼禱。專此祇頌。

近祉。

弟某某謹啓

日 月

○與友言聽任歐戰各國招募華工之失策

某某仁兄閣下。久疏通訊。企想良殷。近諭

興居。定增安善。弟主任工業於斯。尙能自立於社會。卽此  
間工界。且有日形發達之機。乃近來時見報載。歐洲交  
戰各國。在某某等處。招募大多數之華工。送往彼國各  
廠工作。在工人迫於饑寒。流落異邦。固無足怪。惟我國

政府不思設法維護。反聽任自由招募。未免失策。蓋現當工戰時代。工業實與國本有密切之關係。此時運往華工。如潮流之西注。不但楚材晉用。伊戚自貽。而我國工界。且從此必大受其影響。日就於墮落之悲境矣。貴處工業情形如何。甚爲念念。尙祈便中賜示是盼。專此卽請

台安。

弟某某謹啓

月

日

○覆言興工不能吸引外資之理由

某某先生大鑒。頃奉

手書。領悉一切。就諗

起居健勝。

潭第安嘉慰如所頌。來

示謂我省振興工業。必須待舉外債。方可實行。弟意竊不謂然。蓋我國工業。知識幼稚。諸弊易叢。吸引外資以舉事。在在含有危險分子。况歐戰方酣。自顧不給。即戰事告終。列強爭先吸收資金。圖整金融。恢復企業。必致現金缺乏。利率騰貴。若待外資以興工。實為不可能之事。執事此時不注重工業。則已。如果注重工業。尙祈速圖他策。是禱。專此順請。

台安。

弟某某謹啓

日 月

○與友商酌工業調查會之辦法

某某先生閣下。別久思深。惟日以

台候增綏爲頌。茲啓者。弟刻與此間大企業家某某。商及發達工業一事。擬先由各省推選工業專門人員。組織調查會。就各該省天然利便之工業。分門別類。詳究辦法。擇用資少而銷售易者。實用所必需者。爲最大之漏卮者。可以推銷外洋。爲吾國之利源者。按層次而舉辦。或可藉互相聯絡之資力。以見諸實行。倘荷

執事贊成。務乞

惠賜教言是盼。專此奉布。祇請

大安。

弟某某謹啓

月

日

○函請任用工業專科畢業之留學生

某某先生賜鑒。上月趨謁

台端。暢聆

大教。具見

執事提倡工業。迫不容緩之熱忱。惟弟於昨日前往某某  
工業學校。參觀一周。似該校教員程度。尙有名不副實  
之處。查我國東西洋留學生。其學習工業而具有專門  
學問者。頗不乏人。擬請

搜羅此項人材。主持教席。使之本其所學。反哺宗邦。當可



易收成效。而促進社會實業之步趨也。區區愚見。尙希採擇施行是幸。專此奉陳。祇頌

台祉。

弟某某謹啓

月

日

○函述工場自製機器較優於舶來品

某某先生閣下。久睽

台教。時切馳思。比維

履候勝常。

指揮如意。允符臆頌。弟自上年投入某某工場以來。體質

較前健強。堪以告

慰。現在敝工場專製各式有蓋無蓋織襪機器。成績昭著。

甚爲各廠所推稱。近復悉心研究。銳意改良。發明一種自動襪機。並能製造衫褲。其機械之靈捷堅牢。出貨之精美緊密。尤爲舶品所不及。倘

貴處有需用此項機器者。務乞

介紹採購。以挽利權。是所至禱。專此奉布。祇請

籌安。

弟某某謹啓

月

日

○函商保護工場之手續

某某先生賜鑒。日前趨謁

台端。恰值

公出未晤。至以爲悵。茲因敝工場雇用工人。日益增多。均

係陸續招集。未受教育。故流品甚雜。難免良莠不齊。舉動野蠻。時肇事端。或則爭論工價。聚眾要挾。或則違犯規章。不受約束。不遵教授。輒藉細故。無理取鬧。種種滋擾。時有發生。弟念吾國工藝。尚在幼稚時代。若不設法保護。不特有礙工作。抑且影響於營業進行。關係至鉅。緣此特乞

閣下代擬此項文稿。以備呈請官署之手續。希勿以瑣瀆見卻。是幸。專此卽頌

台祉。

弟某某謹啓

月

日

○函答某某工場之出品

某某仁兄惠鑒。頃奉

來書承

詢某某工場之出品。其內部大約分有六科。如紅藍紗科。絲光科。織布科。染皮科。染色科。扇子科等。紅藍紗經十餘年研究。已著成效。以前中國毛巾廠。皆用外貨。自該工場出品後。人皆樂購。絲光線用化學製造。光澤如真。其織布一科。更屬超羣。由其組織之機械。製造之原料。均選上等。製成美彩線呢。洋紗夕法等布。異常平勻。直。駕船品而上。至如染色之皮毛。改良之摺扇。尤能別出心裁。爲工藝所僅見。吾

兄倘需合式貨品。弟可代向該工場定購也。專此順頌。

籌祉。

弟某某謹啓

月 日

○與友籌辦人工造紙之企業

某某仁兄惠鑒。敬啓者。近年以來。我國印刷事業日盛。故洋紙之需用愈多。而從前土產固有之紙貨。則因滯銷既久。產額日微。此項工業。且將見其消滅。於是洋紙一宗。遂爲我國最大之漏卮。自歐洲戰起。洋紙之價值愈昂。印刷之資本益鉅。而文明教育等事業。乃受連帶之影響。若乘此歐戰未停時間。組織宏大工場。招集舊業工人。將固有各種紙貨。改良而製造之。未始未挽回利權。

之企業也。吾

兄倘或有意於此。尙希

賜以教言是禱。專此祇頌

籌祉。

弟某某謹啓

月

日



# 新分類尺牘大全

男女界

## ●女子家庭類 親黨附

○稟祖母父報告到校情形

祖母父大人尊前。敬稟者。孫女前日拜別登車。一路安好。傍晚

卽至某處。到時母舅已遣僕在車站等候。行李一切。託彼照料。遂與同至母舅寓中。次日卽偕某姊。至某某學校考試。國文試短論一首。其外算學二題。歷史地理各一題。孫女獲取第二。某姊取第五。某日移入校中。孫女



幸得前列。不勝惶愧。惟有勉力求學。以副

厚期而已。尙有某種書籍。亟須應用。望卽

寄下。至盼至盼。肅此敬請

金安。

孫女某某敬稟

○稟父報告在校安好

母

親大人膝下。敬稟者。旬餘未奉

慈諭。深爲懸念。近想

福躬康健。適如下頌。女到校以來。瞬將匝月。諸事平善。堪

慰。

垂廬校中各項功課。尙能領悟。而圖畫一科。尤爲教員所

稱賞。謂風神秀麗。筆力雄健。洵非同學所能及。竊思女於此道。素承

母親大人教授。故於入學之初。即得有成績。今日之榮。皆母親之賜也。家中一切。諒皆平安。大哥有暇。望時賜一信。以慰遠系。肅此敬請

福安。

女某某敬稟

○稟父陳述家中情形

父親大人膝下。敬稟者。昨由某世叔交到

慈諭。及家用銀元六十圓。如數照收。敬諭

大人在外。尊體安康。下懷甚慰。日前

母親大人小有不適。旋即告痊。故未函稟。乞勿

遠念。女與弟妹。身體均好。照常入校。未嘗間斷。至星期放

假。各自溫習功課之餘。女更從

母親學習針黹。不敢稍涉戲嬉。瞬屆夏令。店事想可較閒。

尙望

大人回里一行。以慰孺慕之私也。專此稟復。敬請

福安。

女某某謹稟

月 日

○稟母因身病未能稟復之故

母親大人膝下。敬稟者。前接

賜諭。誦悉。壹是。女因近來校中功課甚忙。且於某日忽然

抱病。故未能稟復。至祈

慈宥。女病係偶爾受熱所致。神昏體倦。緣此輟課五日。尙幸趕速診治。服藥兩劑。頗易奏效。刻已就痊。大約明後日精神還復。即可上課。乞勿

垂廬是禱。日內

父親處曾有安信來家否。上星期日。某哥回家否。念念肅此稟慰。敬請

康安。

女某某謹稟

月 日

○稟伯父

母父

請令妹入學校

伯父大人膝下。敬稟者。違侍

慈顏已閱四月。近諭

玉體綏和。至以爲祝。姪女憶入校時。某妹亦欲偕來。當以道遠不便。且慮課程難合。是以中止。現今校中添設預備科。凡粗識文字者皆可插入。肄業一年。即可升入本科。至於一切規則。皆稱完善。故特仰懇

長者準於下學期。

許妹來此。一以遂妹之素志。一以使姊妹相聚。私衷如此。是否有當。望乞

賜示。臨穎不勝依戀之至。專此肅稟。敬請

金安。

姪女某某敬稟

○稟叔父母賀得佳婦

叔父母大人慈鑒。違侍兩月。孺系實深。敬諭

玉體康綏。百凡如意。曷勝抃頌。姪女於某日得某妹信。知

某哥與女子師範畢業生某女士。訂定婚約。聞之至  
爲欣快。因上屆該校行畢業禮。姪女亦參來賓之列。曾  
與某女士一面。不但親見其舉止端莊。且詢知品學兼  
優。爲女界有數人物。今果同意結婚。一喜

叔父母得佳婦。一喜。某哥得賢內助。將來增進家庭幸福。

不卜可知矣。俟屆吉期。姪女定當趨賀。先此道喜。敬請

福安。

姪女某某上稟

月

日

○致兄託買習畫帖

某哥手足。匝月未通音問。惟日以

起居安適爲祝。妹入校至今。按日功課。不敢自懈。上負

二親培植之苦心。第校中現注重圖畫一科。比前更爲認真。

妹所常用之習畫帖。或嫌太簡。或嫌過滯。皆不適用。昨

於同學處見一佳本。聞係某某書局新出之天然習畫

帖。乃就動植各物。攝影製譜。心裁別出。神態如生。妹急

欲自備。以資摩仿。務乞吾

哥代購寄下。至爲感禱。手此卽請

近安。

妹某某敬上

月

日

○致弟責其久無家書

某某賢弟手足兩月以來未得吾

弟一字。猶以爲校課甚繁。無暇及此。乃昨讀

父親大人來諭。亦謂多日未見

弟函。甚爲懸念。夫校中課忙。固姊所深悉。然夜間無事。星

期有假。家書數行。當不至不能爲也。無函與姊。猶有可

說而

堂上安稟。亦致缺乏。按諸情理。實非應爾。尙願吾

弟思之。勿謂姊言直率是幸。專此順頌

學祉。

姊某某手書

月

日



○致姊詢問安好

某姊安覽。握別以來。瞬經數月。懷思之切。想同情也。比維

伉儷雙綏。

庭闈康泰。如頌爲慰。妹里居求學。進步略增。家中自二

親以次。幸均健適。可紓

遠念。聞

姊丈改應某處某校之聘。不知校務較冗否。吾

姊於侍膳餘閒。尙能溫習舊業否。得暇尙望

詳示近狀。以上慰老人。倘能

歸寧有期。早圖家庭歡聚。此尤妹所翹盼也。專此敬請

近安。

妹某某謹啓

月

日

○寄妹論書法

某某吾妹青鑒。別來匝月。馳念良深。昨接

瑤箋。欣慰無似。吾

妹書法素佳。近益精進。秀麗均圓。深得鍾王神髓。甚佩甚佩。惟

來函述及近頃拋棄一切。日以臨池爲事。卽以臨池爲樂。云云。愚見竊以爲不可。蓋書法爲美術之一。又爲酬應所需。固當研求優美。然拋棄重要職業。惟此是學。將來他無所知。何以立身而處世。况

妹書若此。雖不能云精絕。而在近代女子中。已足推爲能手。苟有餘暇。隨時溫習。未爲不可。若必概置一切。而以全力爲此。則計之左也。

妹固智者。當不河漢斯言。此復順請。

近安。

姊某某手啓

月

日

○致嫂勸勿重男輕女

某嫂妝次。昨日某媪來。欣悉。

玉體綏和。只因又舉一雌。以致。

朗月襟懷。時被浮雲掩蔽。此最不可者。世俗重男輕女之見。全賴吾輩挽回之。何得自蹈其覆轍。須知男女初無。

理。如愁將來賠嫁爲難。儘可稱家之有無。且生子而不肖。反致墮其家聲。生女而能賢。亦足光我門第。古今來固有巾幗而遠勝鬢眉者。况吾輩亦女身。使當日爲母者。亦視爲輕賤。想早已形消骨滅。求有今日而不能矣。空言排遣。決不足以動

清聽。故特於根本上解決之。尙希吾

嫂採納。鄙言是禱。手此順請。

近安。

妹某某謹啓

月

日

○稟翁報告到寓後情形

姑翁大人尊前。敬稟者。叩別。

慈顏倍深依戀。職虧侍養。刻不安懷。近祝

福躬康健。眠餐綏和。尤如所頌。媳婦於某月某日始抵寓

中。見某某夫名以下均獲安好。堪慰

慈注。近來店中生意頗爲發達。預料今歲定可獲利。故欲

請

二大人亦同來此。暢敘天倫之樂。聊表爲子之心。未識  
尊意如何。乞卽

諭知。以慰下忱。專肅。祇請

福安。

媳婦某氏謹稟

月

日

○諭媳囑其注意家事

吾媳收覽。予因宿疾。赴申就醫。得以脫然遠行。絕無掛礙者。賴有吾媳能將家事主持也。吾兒日往校中。未便分心。故一切全仗吾媳經理。家中婢僕。不妨以嚴厲待之。倘有過失。切勿徇情。至於門戶火燭。諒吾媳細心過人。無庸諄諄切囑矣。手此卽詢。

近佳。月 日愚姑手泐

○諭子勉其學業

吾兒收閱。汝自進店以來。瞬已半載有餘。不知得有進步否。吾近來身體甚健。望勿遠念。惟願汝作事加勤。留心學習。凡簿記之概要。貨物之往來。均須一一注意。不可

疏忽。果能遵所諭而勉勵之。庶幾三年學滿之後。店內必當另眼看待。隨時提拔。俾可自立於將來。否則程度毫無。斷難重用。卽往就他家。亦無以大任相畀者。始基宜慎。汝其勉之。此囑。

月 日母字

○諭女毋好妝飾

某某女兒知悉。昨日來稟。提及飾品一端。予意甚爲不快。蓋身爲女子。蓬頭垢面。固屬不堪。然過事妝飾。亦非所宜。常見女學生豔服奇裝。招搖過市。旁觀者莫不竊笑而譏議之。試問進德修業之歲月。何來爭妍鬥麗之心。况此身原非玩物。如徒博人憐愛。人格卽處於卑汗。

不可復言。至如寶石珠翠。徒以有用金錢。付諸無何有之鄉。甚爲可惜。再若服用泰西綢緞。及各化裝品。任其利權喪失。尤爲國家財政問題所繫。勿輕看過。余於汝一身費用。毫無慳吝。而獨於此諄諄言之者。諒能曲體親心也。此諭。

月 日母字

○致夫催寄家用

某某夫子賜鑒。不奉

手書。候將半月光陰。容易。又已秋去冬來矣。近諭

起居安吉。店中諸務勝常。爲念。近來家中各事。順妥如恆。

自



堂上以次均各健好。務祈不必

掛懷。惟上次寄來家用。現將告罄。轉瞬歲暮。各項均待開支。望卽籌款。從速匯寄。以免到時爲難。是所至盼。肅此

順問

旅安并望

福音

某某手啓

月

日

○致姆因家事催其速歸

某嫂賜覽。判袂月餘。時深馳念。卽維

起居增綏。是祝。妹於月初接到

手示。敬悉。吾

嫂尚須小住兩旬。遵卽代稟

姑翁大人亦蒙首肯。至今午後奉

姑翁面諭。刻有某事。必須候吾

嫂旋歸。襄理一切。囑卽奉告。尚祈

見信速作歸計。萬勿再有稽遲。好在交通甚便。毫無艱阻之虞也。相晤在邇。餘俟面談。專布卽請

近安。

弟婦某氏祗斂

月

日

○致嬌告分娩平安

某弟婦惠覽。昨奉

手書承蒙

注念。既感并謝。嫂於某日上午八時分娩。幸得一男。均稱平善。祈勿

掛懷。昨日

堂上擬卽僱用乳母。嫂聞之隨時回却。一則緣自己乳水頗多。可以節省僱資。一則恐乳母性質頑劣。必致傳染小孩。反爲不美也。近想

弟婦校務。必甚煩勞。爲念。惟瞬屆彌月時期。諸戚均來。務望

撥冗旋歸一敘。是所至盼。專布。卽頌

時祉。

愚嫂某氏歛衽

月

日

○致夫姊言齋佛之無益

某姑奩右昨奉

惠書就諭

起居多吉欣慰無似承

示近頃習於持齋念佛爲惟一之宗旨藉以消遣光陰甚善甚善夫佛固西方之慈善家也妹亦何敢反對第既經圓寂雖日見人世之顛連困苦亦無可如何譬諸人之父母當其在日凡有益於子女者恨不盡致之凡有損於子女者恨不盡除之一朝委化無論悲歡哭笑已置於不見不聞毫無靈驗之可言想佛理之虛無亦猶

是也。聊陳管見。請

採納之。專泐敬請

閩安。

妹某氏禴衽

月 日

○致夫妹言姑病須醫勿從迷信

某妹惠覽。久未通訊。馳系良殷。昨得某甥女信。始悉

令婢忽患神經之疾。不勝念念。嫂按此病原因。都由於頑

痰膠固。迷入心竅所致。而世人不察。有云前生冤孽。而

延僧懺悔者。有云魔鬼纏擾。而請巫治療者。有云凶煞

照命。而禳星退解者。種種迷信。無益於病。尙望吾

妹勿爲所惑。速延名醫下藥。方爲上策。諒病係初起。未入

膏肓治之或易易也。專此奉達。順頌。

近祺。

愚嫂某氏謹啓

月 日

○稟外祖母述體操之有益

外祖母

大人尊前。敬稟者。叩別以來。倏又兩月。每瞻

慈範。時切孺思。近諭

福履安綏。閣府均吉。亮如所頌。前蒙

誨諭數次。屢以甥女身軀柔弱爲念。曷勝銘感。所幸甥女

自春間入校以來。留意於體操一科。始而猶慮身弱。未

敢嘗試。繼而勉力運動。稍舒筋骨。反覺轉弱爲強。精神

頓旺。食量大增。是可知體操之有益也。茲恐

魔注。專肅奉

聞敬請

尊安。

外孫女某某上稟

月

日

○稟舅<sub>母父</sub>述未能送行之歉意

舅<sub>母父</sub>大人尊右。昨日奉讀

來諭。知

舅<sub>母父</sub>與表妹等一同

榮行。准於本月某日。趁京漢火車北上。甥女理宜赴站恭

送。祇因校中正值試期。未便告假趨前。深爲抱歉。茲謹

具菲物四色。藉伸敬意。務乞

晒納爲禱。肅此祇頌。

行社。

甥女某某謹稟

月

日

○稟姑丈請暫爲代措學費

姑丈大人尊前。敬懇者。姪女在校修業。不克時趨

左右。藉聆

清誨。歎仄實深。頃因校中已屆繳費之期。舍下尙未寄出。

姪女迫不及待。故擬懇

長者。暫爲代措銀元五十圓。以便繳付。一俟款至。當即奉

還不誤。倘蒙

俯允。祈即交來手帶下爲感。專此奉懇。肅請



福安。

內姪女某某敬上

月 日

○稟姨

丈母

述與姨表妹安抵校中

姨

丈母

大人尊前。敬稟者。甥女偕某妹一同上輪。後當晚起棹

而行。一路浪靜風平。眺望江天勝景。洵可樂也。於某某日安抵此間。隨至校中寄宿舍。安頓行李。甥女卽代某妹報名入學。好在該校無須先行考試。祇問程度。當插某班而已。甥女現與某妹身體均好。望勿

垂念。特此奉

聞。敬請

福安。

姨女某某敬稟

月 日

○託表伯代請西醫

表伯大人尊前。敬稟者。家母近患外症。腿部陰面。癰大如掌。晝夜呻吟。腫痛難忍。雖屢邀中醫診治。內服瀉火之劑。外敷拔毒之膏。迄無效驗。姪女再三思維。惟有延請西醫。或能迅奏膚功。聞

長者素與某西醫熟識。乞卽

代爲一邀。醫金若干。並希

示明。以便姪女照送也。種種

費神。容後面謝。專此敬請

康安。

姪女某某上稟

月

日

○致表妹勸閱女子雜誌

某某表妹青鑒。久別

芳容倍深神系。近維

寢興安燕。諸凡吉祥。爲頌。邇聞

賢妹在家自修。大有進步。已能涉獵稗史。至可佩服。近日此間新出女子雜誌一種。論說精詳。紀事明晰。比前所出之女界白話報。較有趣味。

賢妹如欲定閱。當由敝處代購一份寄上。姊預料數月後。吾

妹能取資於是。學識必更蒸蒸日上矣。專此卽請

學安。

愚表姊某某手啓

月

日

○致表姊商入他校

某某吾姊惠覽。別來兩月。音信未通。此兩月中。不知吾

姊進步何許。不知妹受悶幾許。妹校名實不副。尤以校舍局促。爲第一缺點。既處城市之中。空氣甚少。又復人多舍仄。隙地毫無。於衛生上。良不適宜。故妹決計改入他校。俾免起居抑鬱。惟不知何校較佳。敢求吾

姊詳示。以便擇從。專此奉懇。祇頌

學祉。

表妹某某謹上

月

日

○致女壻述女生產平安

某某賢壻青覽。兩旬未得

手書。想店事忙迫爲念。本月中旬。因小女將屆分娩之期。照料乏人。邀予到家陪伴。以壯其膽。喜於某日晚間亥刻。產一麟兒。試聽啼聲。知係英物。可爲

賢壻賀。小女產後身體強健。一切惟囑其小心謹慎而已。茲恐吾

壻懸念。特修書告慰。并報喜音。專此順問  
近安。

愚某氏手泐

月

日

○致親母謝其問疾

親母座右。日前賤軀。偶抱小恙。承蒙

垂詢並命小女歸家看護。足見

親母體貼人情。無微不至。感甚感甚。其實不過稍受風寒。醫生下發表之劑。當日汗出即愈。惟覺身體軟弱。一時未能復原耳。恐勞

錦注。故特修函奉

聞。專此祇請

近安。

歸某郡某氏檢祚

月

日

○致夫表嫂勸種西法牛痘

表姆賜覽。前上寸緘。意欲屈

駕臨舍。作數日之盤桓。頃讀

來示。始悉擬爲某姪種花。未能分身。姪亦何敢相強。但思中國種痘舊法。頗費周折。且多禁忌。設或花苗選擇欠佳。易生危險。遠不如西法牛痘之萬穩萬當。可以放懷。偷恐所發不透。不妨多種一二次。自無後患矣。未識尊意以爲何如。專此卽請

奮安。

表弟姪某氏謹上

月 日

○致夫表姊言觀書之有益

表姑芳鑒。日前在某園中。不期而遇。立談片刻。據吾

姑云。靜坐在家。除略動針線外。一無所事。殊覺悶悶。氏以爲消遣之法。惟有披覽新出各種之名媛著作。頗能引

人入勝。不啻在山陰道上。有應接不暇之勢。非但足以排遣無聊。且可增益我輩之見聞。諒

尊意亦必以爲然也。氏有新購數種。持以奉贈。尙希晒存是幸。此上祇請

時安。

歸某郡某氏謹上

月

日

○致夫表妹勸其注意衛生

表姑惠鑒。久睽

芳顏。良深系念。頃聞某嬖來言。始知吾

姑惜福過甚。常將隔宿之食品。留至變味。未肯輕棄。且自食之。殊與衛生有碍也。因變味之物。其中必有微生蟲。



叢集潛滋。西醫言之甚詳。一入腹腸。爲患頗大。吾姑所以不時抱恙者。未始不由於此。尙希此後

注重衛生。自奉切勿過約。是禱。專布。卽請

近安。

歸某郡某氏謹啓

月

○致甥女託其照顧女兒肄業

某某賢甥女如見。多日不敘。甚以爲念。今汝表妹某某擬入校肄業。聞得汝校甚佳。特遣某嬾陪渠來前。到時相煩報名。一切均請照顧。因渠年幼無知。俱須汝一一教導。望勿以姊妹平輩。稍存客氣。倘有不是之處。汝不妨當面指斥。我非惟並不見怪。并且感激汝之盛情也。應出

學費已由渠帶上矣。專此順詢。

近佳。

愚某氏手書

月 日

○致夫甥婦言須早防疫氣

某甥婦妝次多日未晤。時以爲念。茲聞外間疫氣流行。甚爲危險。溯厥原因。皆由夏間雨澤太少。河中污濁不堪。設飲此水。必然受病。况目下時值初秋。熱度高至一百餘分。飲食最宜謹慎。每日必須督率僕婦。掃除各處積穢。將避瘟藥水。遍灑一周。切勿緊閉門窗。阻塞空氣。如此防患於未然。或可免癘疫之侵犯也。務望甥婦格外注意。切勿疏忽爲要。手此順問。

近祺。

愚某氏手啓

月

日

●女學職業類

○與表妹論初學作文

某某表妹文席。昨日

舅父駕過。校詢知吾

妹近學爲文。頗喜讀古人紀事之作。甚善甚善。蓋文體約分二種。卽議論與紀事是也。議論屬空。紀事屬實。議論不特以文字稱。尤當以見識著。紀事之作。則就事紀事。能簡括明暢而已。故初學爲文。當從紀事入手。此姊平日所聞於教師者如是。而證之實驗。益信爲不誣。今吾

妹喜讀紀事文。乃與此旨恰合。可見別有會心。不假師授。而能悟得學文之秘訣。良用欽佩。此後倘有

新獲進益。尙祈毋吝

賜示是幸。專此卽頌

學祉。

愚表姊某某手啓

月

日

○函告某女校注重家政常識之主旨

某某同學姊賜鑒。頃奉

蘭緘承

詢某女校內容。別具深意。良用欽佩。蓋近來各處。倡言女學。而轉致風俗頹敗。禮教陵遲者。弊在稍得新知。遽棄

舊德女賊不講國故。罔知畫荻和熊之教。已亡平等自由之風。彌盛人道。滅絕國本。將願女界明達。早已審察及之。此間某某女學校。爲某某女士所創設。提倡國學。注意婦功。開辦已近三年。艱苦曾經百折。近擬於原有國文講習科。高初兩等外。增設縫紉刺繡科。授以家政常識。應用技能。幼穉科亦日事研究。以端重蒙養。聞貴處女界日進文明。倘有立志求學者。尙祈隨時紹介。是禱。專此順頌。

近祉。

妹某某謹啓

月

日

○函寄家事實習室之說明書

某某吾姊青覽。自違

蘭範。時切葭思。頃奉

惠書。就諭

起居增綏。甚慰渴念。承

詢某某女校課程。實有足資改善者。該校各種成績。早稱  
優美。并有家事實習室。預備爲良善家庭之導線。故其  
課程以家政爲中心。而他項爲輔。且具有說明書。洵爲  
最新研究之女子教育。近來女學辦法。已多趨重於此  
點。妹特將該校課程表及說明書。一并寄呈

督閱。至祈

查收。專此卽請

文安。

某某謹啓

月 日

○與妹言中國女學之興較先於歐美

某某吾妹如見。頃接

來書。謂中國女學。方在幼稚時代。斷不能與歐美相較。意蓋抑中而揚西也。庸詎知我國女學之興。始自三代。其時歐美諸國。尙爲不開化之野蠻。夫何有所謂女學者。我國今日之女學。果能務求實際。並重體育智育。復以道德爲教育之中心點。後此女學之盛。安知不爲全球之冠。况我有四千餘年之文化。他國無之。我有二百餘

兆之女界。他國無之。不鳴則已。一鳴驚人。尙望吾妹勿先自餒。是幸。專此卽詢。

近佳。

姊某某手啓

月 日

○與姑言人母爲家庭教育之主任

某姑惠鑒。正殷遐想。忽展

手書。欣諭

履候佳安。至以爲慰。承

示某甥性質穎異。現已施教育於遊戲之中。甚善甚善。蓋我輩擔任母職。卽須擔任母教。緣兒童親近其父之日少。而親近其母之日多。故家庭教育。當由爲母者主任。



之語云得一賢母勝於良師。此雖常言。洵足玩味。今吾姑早已注意及此。可知某甥將來之成就。正難限量也。手此卽請

近安。

愚嫂某氏手啓

月

日

○覆言女子當先研求實用之學術

某某夫人史席。前日過從。備聆

請誨。欽甚欽甚。今復殷殷以學程之先後

垂詢。愧無可陳。謹述師言。藉呈

尊覽。蓋學以實用爲歸。則取舍不難立決。願實用之中。有常用者。有不常用者。此尤志學之初。所當明辨也。夫立

身處世。必需之學。既能深知。乃進而求高尚之理。精微之詣。是則善矣。倘若舍邇而求遠。棄易而圖難。未有不立蹶者。今日女子求學。大都喜務虛聲。而不圖實際。卽或以實際爲趨向。而舍邇求遠。棄易圖難之弊。又鮮有能除。此則近來女學流行之通病也。某見如此。是否有當。尙祈

鑒察是幸。肅此敬請

文安。

某某謹啓

月 日

○函詢專科宜學何種

某某同學姊惠鑒。久疏音訊。時切懷思。比維

履祉延綏。

講祺集吉。允符遠頌。妹愚陋如恆。愧無可述。惟念現今世界。非有專門科學。無以爲自立之謀。倘仍就女學之普通者而肄習之。竊恐一身之精力有限。勢難並務而兼營。尙乞吾

姊抉擇近頃趨勢之所宜者。

指示方鍼。俾得學有歸宿。而免歧趨。爲禱。專此奉布。祇請教安。

妹某某謹啓

月

日

○覆言女子手工講習所之成績

某某賢姊青覽。頃奉

蘭翰藉諭

閩祉吉羊。

潭祺安燕。無任欣慰。承

詢此間女子手工講習所之內容。蓋成立方經一載。而功效業已卓著。所有生徒學成後之製品。運美發售。頗邀彼邦所歡迎。緣其所授之盤編花邊。結網花邊。抽紗編結等手工。皆爲歐美服裝日用必需之品。製時不用機器。往學不限資格。每科三月。便可畢業矣。我鄉婦女。向乏專長。分利坐食。爲社會累。其優秀者。復視婦工爲可恥。良堪嘆惜。吾

姊果欲提倡此種手工於梓里。妹當竭力贊成也。此覆。敬

請

近安。

妹某某謹復

月 日

○函述提倡內地女子工藝之情狀

某姊愛鑒。頃接

手書。藉知

起居安吉。甚慰渴念。承

詢此間女工傳習所近狀。現在所長某先生。因憫內地女

子生活困苦者衆。特將花邊抽紗各種不用機器之手

工品。製成順序標本。及製時所用之簡單器具。不惜犧

牲其精神與金錢。親往內地貧瘠區域。周行演講其製作之法及其利益。并勸人就地設所傳授。既可救濟貧苦女子於國內。復可收回利權於海外。聞其行程大約先往江北。而後次至浙東。且先生之夫人某某女士。近亦有女子生計會之發起。其概要以提倡女子生計。勸導勤儉儲蓄爲宗旨。刻正徵求各方同意。不日可以發表矣。并以附聞。專此奉布。順請

儷安。

妹某某謹啓

月

日

○函言刺繡爲中國特種之美術品

某某仁姊青覽。前因便人寄奉繡件數事。聊伴蕪函。遽蒙

獎譽。并擬來此學習。陋劣如妹。愧不敢當。惟念刺繡一端。現爲我國女界特種之美術品。不但會場比賽。可獲最優之獎章。而且歐美各國。不惜以重金採購。可知刺繡在今日。頗有價值也。以吾

姊之才。略加研究。約費旬餘光陰。即可得其神妙。如果惠臨。姊便當掃榻以待。忝附

愛末。萬勿以片長見重。是幸。專此卽頌

近祉。

妹某某謹啓

月

日

○致表妹允教結線

某某表妹如談。頃聞某嫗述及。

賢妹意欲來此學習結線手工。其善甚善。惟姊已多時不從事於此。因結線一項。花樣甚多。不可殫述。始則僅用泰西毛絨光絨兩種。近更趨重於東洋棉線。而間染以五綵者。我國女工購用。日益繁多。西洋絨線定價。既視金磅爲漲落。而東洋棉線。近頃亦逐漸昂貴。料本既重。工資復輕。姊早擬舍此而別圖他技矣。今

賢妹喜學此藝。殆亦爲家庭需用之計。尙望得暇惠臨是盼。專此順頌。

近祺。

愚表姊某某手啓

月

日

○勸嫂習裁縫以備家庭之作用



某嫂左左計自分袂。一月垂盡。辰維

起居安吉。爲頌爲慰。妹在校碌碌。無善可陳。惟於裁縫一科。稍能領悟。前教員某先生編就裁衣法一書。卽按口上課所講者。茲已由某某書局印行。此書有圖有說。自禮服衫褲以至筆護書袋等件。莫不備載。裁翦之法。縫綴之術。分條詳陳。瞭如指掌。今特寄呈一冊。以供

瀏覽。想吾

嫂精通文字。又復心思靈敏。披圖按說。不難一望而明。倘於

暇時練習。以備家庭之作用。則裁縫無須求人。費旣省而

工且精。獲益當不少也。特未知

高明以爲是。否。此上順請

邇安。

某某謹上

月

日

○函言女學工藝以適用之生活爲主

某某仁姊如面前奉

惠書。知欲調查某某女校情形。妹當即託人轉商該校校長。屆期當即在校預備招待一切矣。惟妹意對於近今女校之辦法。程度不必求其過高。各科教授。必須合於一般社會之心理。而所學工藝。皆以適用爲主。一經畢業。即可恃以爲生活。於女子習慣之依賴性質。補救實

非淺渺。想吾

姊至某校調查後。常信妹言之切實也。專此奉復。祇頌

文祉。

妹某某謹啓

月 日

○函告工廠操作之情形

舅母大人尊前。日久未上寸稟。殊抱疎慢之愆。今蒙

手諭遙頒。

諄諄下問。關切備至。愈令甥女感愧無既矣。去年 父親

因病歇業。纏綿床第。幾及半載。遂致家用日絀。生計艱

難。母親以針黹補助。無濟於事。故甥女往工廠作工。

亦出於萬不得已耳。每日在廠八時。工資約有兩角。可

貼開銷。所幸身體較前強壯。工作亦覺習慣。且有一定時間。幾忘用力之勞。可見人生職業。卽女子亦不可少者也。請

舅母勿以爲念。是禱。專此奉復。敬請

懿安。

甥女某某敬啟

月

日

○函詢女子應學之職業

某某仁姊左右。別逾數月。馳念良殷。惟

起居如意。

教務勝常爲頌。妹里居無聊。近擬編輯女子職業扶要一書。以爲將來實行自立之預備。惟各項職業之梗概。一

時選集爲難。因思吾

姊久任滬江教席。見聞較詳。乞將近頃女界辦有成效者。如勝家縫紉學校。女子興業公司等。實行之章程。逐一費神搜寄。并祈

詳示必要之主旨。是所至禱。專此奉布。卽請  
文安。

妹某某謹啓

月

日

○函商開設女子國貨店

某某仁姊芳鑒。違

教多時。想

興居如意爲慰。茲啓者。妹平日與

姊談論言及今值商戰時代。洋貨如何充斥。國貨如何不振。輒相對歎息不止。妹近推厥原因。良由我國商業經營者無非男子。而女界獨付缺如。且未有講究及此者。現在女學日益振興。於書算簿記等事。漸多通曉。故妹擬招集股本。開設女子國貨店。以爲挽回利權之計。店中各項執事。均用女子。某某女士已允擔任賬席矣。但妹雖發起。獨力難成。因吾

姊素表同情。用特修函奉約。請於明日

光降舍間。商議進行之法。幸甚盼甚。肅此祇請

近安。

妹某某謹啓

月

日

○函告將有女銀行員出現

某某學姊惠鑒。一別半載。思何可言。比維

德業兩進。爲慰爲祝。妹曾憶去歲與

姊談及前孫總統採用女秘書。與洪憲皇帝採用女官之事。不禁撫掌大笑。乃頃聞我國某某銀行某總裁。有採用女子充當司賬之說。其主張之理由有三。一、女子心思細密。較勝於男子。二、女子俸給。可低於男子。三、女子可以實心任事。不致見異思遷。蓋某總裁數年前曾吸得英倫空氣。此次擔任銀行職任。故擬實行其主張也。

吾

姊亦係留學外洋者。尙希將歐美女界執務之概略。列舉以示。是禱。專此泐布。敬請

近安。

妹某某謹啓

月 日

○函述烹飪學爲女子應用之職務

某某吾姊雅鑒。別來數月。馳系良殷。近維

幸福日增。爲慰爲祝。妹自離校以來。碌碌無可陳述。惟日

親烹飪。幾同傭婦。文字一道。置之久矣。然竊以自慰者。則由爾時在校。曾習烹調一科。故今日爲之。頗能得手。妹想同學姊妹。多視此事爲瑣屑。不肯切實講求。蓋不至應用棘手之時。不知其裨益於家庭甚大也。尙望吾



姊及時勉之。並以此意轉告諸同學。是幸。專此奉布。並請學安。

妹某某謹上

月 日

●師友交際類

○上校長因父母病請假

吾師尊鑒。敬肅者。自違

左右。瞬逾星期。每念

起居。至爲悵仰。受業假歸里中。本擬家事粗畢。便即言旋。

不意家母忽於日昨。身發寒熱。一時難望清減。受業

因此不得不暫留侍疾。以盡私忱。敢請我

師展假十日。俾得朝夕看護。一俟親病全愈。即當回校。

銷假。決不敢稍事遷延。謹陳下情。伏乞

鑒允。肅此奉懇。恭請

崇安。

受業某某謹稟

月

日

○上校長介紹學生入校。

吾師左右。敬肅者。違

訓盈旬。孺慕曷已。茲有受業隣居某某先生之女孫。年十三歲。向在家塾讀書。國文能作短篇。算術亦略解一二。今欲入本校肄業。以此程度。不識可插入某班否。俟及開校日期。當即偕來考驗。囑受業先行稟告。並乞將新訂章程。

賜寄一份。以便查考。此上。敬請

道安。並候

福音。

受業某某敬上

月 日

○稟告畢業後已膺聘教習

吾師鈞鑒。受業久遠

函丈。企慕良深。敬維

道履康彊。

潭庭安泰。至以爲頌。受業舊歲回舍。本擬再至某某女子

高等學校肄業。乃家本清貧。學費難措。又恰值某某女

士在邑中創辦某某女校。國文教員。尙未得人。屢囑受

業以承斯乏。受業不揣淺陋。赧然應之。現已於某日上課。惟惴惴恐難勝任。尙乞

吾師得暇。隨時

賜誨。以匡不逮。俾受業無隕越之虞。而免貽母校辱也。是幸。專肅敬請

道安。

受業某某敬上

月

日

○探問同學消息

某某仁姊青鑒。前日把晤。得聆

清誨。快如何之。茲啓者。某某女士。前在敝校肄業時。較妹上二級。與妹最善。自畢業後。卽未通訊。傳聞已至天津。

某某高等女校肄業。或又謂現膺某邑女校教員之聘。未知孰是。一別兩載。音信沈沈。每念舊游。黯然久之。素知吾

姊與某某女士相契。倘若悉其踪跡。尙祈

賜示。以便通函。此布。順頌

近祺。

妹某某謹啓

月

日

○函問女演說團出發日期

某某先生賜鑒。前讀

大教。知因內地風氣未開。不惜

苦口婆心。爲覺路之先導。特組織女子演說團。前往各處

演說。佩甚佩甚。蓋現今社會心理。對於女子之舉動。較男子尤易招人注目。且事關公益。又屬創聞。將來感動人心。不能得之於鬚眉千百言者。必能得之於巾幗一二語。故法國羅蘭。恆爲勞動界所歡迎。亦可見人情之所趨重矣。茲聞

部署業已完妥。出發之期。究定何時。敢代表此間社會。先行致意歡迎。專此奉布。祇頌

行祺。

某某謹啓

月

日

○致世姊問行期

某某賢姊左右。昨造

尊府問候

伯母起居適見吾

姊家報始知

駕將南旋但未預定日期耳。倘可月杪

返旆。道出申江。妹擬託購某某等物。爲舍妹下月初旬于

歸之用。並擬請吾

姊惠臨。以光蓬華是幸。如有事尙須多延。亦希

示知。以免翹盼。專此奉布。祇請

旅安。

妹某某謹啓

月

日

○奉世伯母慶賀壽辰

世伯母座右久別

尊顏時深神系。敬謔某月某日。爲

世伯母六旬大慶。姪女本當買棹歸來。登

堂拜祝。祇緣冗務羈身。不克稱觴上壽。此心殊覺歉然。茲

特寄呈薄禮四色。伏祈

哂納。藉伸祝忱。肅此奉賀。祇請

福安。

世姪女某某肅上

月

日

○賀學友畢業

某某賢姊如握。前月一晤。忽忽兩旬。方以未得吾

姊消息爲念。日昨某女士來談。始悉



貴校於某日考試畢業。

賢姊獲列優等。欣羨何似。吾

姊天資既已過人。平時更加力學。久爲私衷所欽仰。今之

高取。妹固早意料及之。惟自愧碌碌如恒。無可陳述。雖

向學甚切。而進境難期。以視吾

姊。眞覺望塵弗及矣。專此奉賀。卽請

學安。

妹某某謹啓

月

日

○慰同學久病

某某同學姊賜覽。一別盈旬。思與時積。日來

貴恙何似。服某醫生之藥。已稍見效否。念念昨晤。令表

姊某某女士。談及吾

姊因抱病未痊。曠業太久。焦憤之心。現於顏色。此妹竊以爲不可者。蓋曠課固非良事。然抱病亦無可如何。因久病而焦憤。非特不能減輕。且恐由此而加劇。尙望吾姊耐性安神。靜謐調治。俟全愈後。入校補課。亦易易也。專此奉慰。敬請

痊安。

妹某某謹啓

月

日

○規同學勿染時習

某某吾妹如面。自同几硯。已閱三秋。親愛之忱。一時無兩。吾妹天資聰穎。遠在姊上。佩服甚深。惟姊竊有不滿意於吾

妹者。則以近日頗喜修飾。一切裝束。務求入時。雖覺顧影  
翩翩。究非吾儕所應爾。夫垢面蓬頭。固嫌太陋。而選衣  
擇履。未免過侈。須知女子服飾。清潔與繁華。當辨不得  
藉口衛身。遂染一般流行之時習也。忝在

知己。不敢默然。尙祈

俯納鄙言。仍崇樸素。是幸。專此順頌

文祺。

愚姊某某上言

月

日

○覆言當矯厚索賂贈之弊習

某某仁姊大鑒。昨奉

手教。描摹中國社會重男輕女之情形。何其淋漓盡致。如

此也。然妹對於爲女者。亦不願寬其責備。緣女子當遭嫁時期。衣服箱籠。種種需索。在旁觀者已歎爲薄於母家。而厚於壻家。其實爲體面二字所誤。亦欲於過門後。再圖緩急相通。孰知權不我操。心已外向。姑嫂既構嫌隙。兄弟亦多違言。甚至迫致父母於顛連疾苦。而莫可如何。遂令人以生女爲大戚矣。聞吾

姊出閣。卽在明春。倘能

力矯此弊。由一身而改良風俗。吾黨幸甚。社會幸甚。此復  
祇頌

近祺。

妹某某謹啓

月

日

○託代聘幼穉園之保姆

某某仁姊賜鑒。不親

芳範。瞬已經年。月夕花晨。時殷渴想。辰維

懿祺集吉。

敎祉迎祥。爲頌無量。妹辦學數年。近覺稍有經驗。惟此間  
女學校。雖設有數處。而幼穉園尙無人議及。妹現在提  
議創設。頗爲同志贊成。經費地址。均已規畫就緒。所急  
需而難得者。爲保姆之人才。吾

姊旅外有年。深於閱歷。務祈

留意速代延聘。俾可早日開辦。至爲幸禱。專此奉託。順請

近安并希

賜復。

妹某某謹啓

月

日

○介紹女教師

世伯母座右敬肅者前承

面諭囑姪女物色女教師一人。以便延聘至家。教導諸妹。學習書算刺繡等事。因一時急切難尋。以致延擱月餘。諒

尊處亦未必請定。今者適逢其會。有同學之親戚某某女士。忽然來此相訪。與姪女晤談片刻。一見如故。甚爲相得。始知女士曾在某某女校畢業。精於書算刺繡等事。

頗與

伯母之意相合。倘欲延訂。乞卽

示知。姪女便可託同學轉請也。特此奉

聞。祇請

懿安。

姪女某某敬稟

月 日

○請代介紹閨友

某某吾姊雅鑒。自遠

蘭範。彌切葭思。近維

履祺文祉。豈是吉祥。慰所如頌。茲有某某女士。係敝鄰某

先生之女公子。擬於下學期入某校肄業。惟查該校章

程。必須有熟人介紹。某先生商之於妹。託爲代覓熟人。用特敬懇吾

姊。列名爲介紹人。俾得遂其求學之心。同深幸感。某女士與妹爲隣數年。行止素爲妹所欽佩。明日當令趨

謁。尙祈

推愛接待。是禱。此上。卽請

時安。

妹某某謹啓

月

日

○函薦某女學教員

某某先生

近今女學界均稱先生

惠鑒。久別

芳顏。思與時并。辰維



履祺晉吉。

文祉增祥。良如臆頌。茲啓者。敝同學某某女士。現任某某女校職務。因校中一切均不完善。擬卽告退。以圖另就。頃聞

貴校國文歷史科教席。急需替人。倘可卽以某女士擔任之。甚爲兩便。至某女士之學業人品。亦爲

先生所素知。無待贅述。如荷

允行。卽祈

惠復。當爲函致某女士。商訂一切也。特

愛推薦。尙望

恕其冒昧。是幸。專此奉布。順請

教祺。

妹某某謹啓

月

日

○邀觀女飛行家演放飛機

某某仁姊青覽。別久思深。惟日以

起居多吉爲頌。茲啓者。美國女飛行家史天蓀女士。於某

日在吳淞開始試演飛機。想

貴處亦早有所聞。今據該女士云。數年以來。航空業雖大有進步。然尙在幼穉。但預料他日飛機。必爲運輸上之一種重要機關。有裨於人道不淺。果爾。則將來或成飛行之世界。亦意中事也。妹於初次演放時。因事未獲往。

觀現該女士復訂於某日再演。以盡其技。吾

姊倘若有暇。尙望屆期

惠臨。偕往觀彼御風之仙子。而一快眼簾。好在滬杭交通  
甚便。切勿遲誤。是盼。專布。卽請

近安。

妹某某謹啓

月

日

○邀學友看花

某某仁姊青鑒。久未把臂暢談。深爲悵悵。際此春雨初霽。淑  
氣迎人。會問傍東園林。羣芳獻媚。不啻一幅天然畫景。  
妹又新得名花數本。洵是異種不類凡葩。因念吾

姊愛花如命。與妹同情。用特函請

玉趾惠臨。題詩品賞。且藉此一剖衷曲。在小園盡竟日之歡。如不

見却。明晨。妹當掃徑以待也。專此卽頌

日祉。

妹某某謹啓

月

日

○函請改赴美術展覽會

某某契姊賜覽。頃奉

蘭言。約於星期日往遊某園。理應奉陪。惟妹意以某園風景雖佳。常往玩遊。似無趣味。頃聞城南某某女校。適定本星期開美術展覽會。各種手工成緒。冠絕一時。久爲各界所稱許。吾

姊有興出遊。不如改赴該校參觀。較爲有益。倘荷  
同意。屆期請卽

惠臨敝校。結伴前往。妹當偕諸友守候也。此行實爲難得。  
並非故示反對。尙祈

諒。是幸。手此順頌

近祺。

妹某某謹啓

月

日

○函辭友約并言女子觀影戲之不便

某某仁姊雅鑒。昨奉

來示。敬悉。承

約往觀影戲。本極贊成。妹刻據他人傳述。某園此次新到

之歐戰影片。現出各種幻景。歷歷如在目前。尤爲佳妙。然恐觀者太衆。流品甚雜。未免坐位擁擠。男女難分。且當開幕之際。全場黑暗。其中曖昧。實非言語可形容。總之此等區處。非女子所宜遊覽。據妹愚見。明晚改往舞台觀劇。較爲有聲有色。且無意外之虞。未識吾姊以爲然否。此復順請

時安。

某某謹啓

月

日

○約友參觀職業女校

某某仁姊惠鑒。旬餘未晤。想

履候安佳爲慰。妹前擬調查各女校。未知以何者爲最優。

昨得某某女士來函。據云某處某某女校。較爲完善。其性質近於職業教育。所有功課。除普通科學而外。注重於縫紉刺繡製花各門。而需要之原料。均由校中代備。所得各生成績品之售價。亦概歸校中。以補助常年經費。此種辦法。甚合妹意。妹已函訂於某日前往參觀。知吾

姊亦與該校校長相識。屆期務望惠臨。以便偕往。爲盼。手此卽請

講安。

妹某某謹啓

月

日

○約友遊園

某某仁姊芳鑒。逕啓者。妹自暑假放後。歸家溫習。久未一抒積悶。當茲薰風撲面。炎威逼人。此間雖無消夏之灣。然聞某園荷花盛開。叢樹密障。頗足品茗。故擬向綠蔭深處。快滌煩襟。想吾

姊素畏炎熱。必當深表同情也。明日午後。在舍恭候。綺臨。偕往該園而盡遊興。是所至盼。專此卽頌。

近祺。

妹某某謹啓

月 日

○約友晤談

某姊惠覽。不晤又月餘矣。想吾

姊德業兩進。爲慰。妹於下星期日。當返舍一行。省視家母。



吾

姊若無他事。務祈屆期

惠臨。以圖良晤。而傾積懷。舍間屋後荒地。近已闢爲球場。

大足趁技。吾

姊來時。姑試一局。想尤所同意也。手此。並請

學安。

妹某某敬上

月

日

○約赴音樂會

某某吾姊賜覽。遠

教旬餘。想日來

履祺增吉爲慰。茲因某某女校。於某日開音樂大會。送來

入場券廿張。諸同學均欲前往。惟妹意尙未決定。因於音樂一門。未甚研究。似與會殊乏趣味。因思吾

姊素諳此中奧妙。倘若屆期亦往。妹當樂陪。以便隨聆教益。是否務乞

賜覆爲盼。專此卽請

文安。

妹某某謹啓

月

日

○暑假約同歸里

某某吾姊惠鑒。昨奉

蘭札。知

貴校暑假。昨已發表。妹校假期適在

貴校前一日得與吾

姊結伴返里。途中既免寂寞。復可互相照應。何便如之。倘

蒙

不棄。卽祈

賜示行期。以便預備一切。若檢點行裝。須妹相助。當卽趨  
前效力也。專此順頌

日祉。

妹某某謹啓

月

日

○贈友書籍

某某賢妹如面。姊自赴校至今。頗以未得

手書爲念。刻聞

賢妹因限於經費。未獲入校。殊爲憾事。然能在家自修。勉從事。未必遜於在校肄習者。況吾

妹天資穎敏。遠勝於儕輩乎。茲寄上女子國文教科書八冊。算學教科書二冊。聊爲進修之助。以省購置之資。尙希

哂納是幸。專此順頌。

進步。

愚姊某某手啓

月

日

○代友求畫

某某仁姊惠鑒。久違

教益。倍切神馳。比維

起居安適爲頌。茲有懇者。妹之同學某某女士。久仰吾姊大名。且知精於畫法。故託妹轉求。不論山水花卉。卽乞大筆一揮。附上宣紙兩幅。不知合用否。有費清神。容當面謝。專此奉懇。順請

文安。

妹某某肅啓

月

日

○致友借書

某某仁姊如握。自上月晤談。不見又旬餘矣。近維學與日進。爲祝。茲啓者。前在

尊處。繙閱几上某種書籍。甚佳。歸後卽至書肆購辦。據云此書現已售罄。悵悵而返。然心戀此書甚切。可否乞吾

姊借妹一閱。以擴眼界。好在該書卷帙無多。兩日當可覽  
畢。奉還。斷不致誤。如荷。

俯允。卽祈交來手帶。下是感。專此奉懇。敬請  
學安。

妹某某謹啓

月

日



# 新分類尺牘大全

● 普通社會界

## ● 慶賀類

○ 賀人祖父壽

某某仁兄左右。久闊

芝儀。時深葭溯。頃聞月之某日。爲

太老伯幾旬大慶。仰

重闈之吉曜。卜

五世之昌期。敬維



燕翼貽謀。

鶴舞錫祉。隨舞

斑衣而介壽。代持

筇杖以承歡。

福萃一堂。欣陳三祝。弟奉僭心殷。攬衣跡阻。臨風額手。歎

仄彌深。謹具菲儀。尚乞轉呈

莞納爲幸。專肅。祇叩

崧齡並頌。

侍祺百備。

弟某某謹啓

月

日

○賀人祖母壽

某某仁兄惠覽。久違。

眉宇。恒切心藏。忻諗月之某日。爲

太老伯母幾旬榮慶。瞻

良辰之華輓。仰

疊舞之綵衣。恭維

壽考維祺。

天倫可樂。

慶衍桐孫以備福。

祥徵桃實而增歡。引企

德門。曷勝忭頌。弟羈身遠道。不獲親自登堂。介景祝延。良

深抱歉。謹具菲儀。幸卽

見納代呈。是所幸感。專肅虔叩

慈齡。並請

侍安。

弟某某謹啓

月

日

○賀人祖父母雙壽

某某仁兄惠鑒。頃得某君某某來函。忻諭某月某日。恭值

太老伯老伯幾旬雙壽。仰

重闌之集祜喜

偕老之延釐。敬維

福備人間。

圖開家慶。

膝繞孫曾以介兕。

眉齊耄耋而祝鳩。

壽曜翹瞻舞竹無既。弟遠道羈身不克。臨衣申敬。下懷抱

歎。尙乞

鑒原。附呈菲儀。幸卽

晉納。是荷。專此上賀

蕃禱。祇請

侍安。

弟某某謹啓

月

日

○賀人父壽

某某仁兄閣下。久疏賤候。深念

起居。茲聞月之某日。爲

老伯幾旬華誕。贈

德星之協慶。欣

愛日之承歡。敬維

椿蔭滋濃。

蘭階溢喜。

啓霞觴而舞綵。

依海屋以添籌。仰企

華堂曷勝藻頌。弟本擬趨前。爲一樽之獻。而情殷迹阻。抱

款奚如。謹具菲禮。至乞代呈

賞納。是所幸感。專此肅賀

番齡。祇請

侍安。

弟某某謹啓

月

日

○賀人母壽

某某仁兄左右。自違

大教。遂積歲時。頃聞某月某日。

老伯母壽登幾秩。糖

練衣之戲舞。仰

華輓之榮光。恭維

愛日長暄。

慈雲溢蔭。

歌譜陔南以介壽。

筵開堂北而承歡。翹企

吉暉。曷勝忭頌。弟誼屬通家。應儕觥獻。奈緣事羈。未克摠

衣。謹具菲儀。聊申賀悃。幸卽

鑒存。是所忻荷。專肅祇祝

萱齡敬請

台安。

弟某某謹啓

月

日

○賀人父母雙壽

某某仁兄左右久別

光儀。莫名企憶。頃得舍間來函。云月之某日。爲

老伯伯幾旬雙慶喜

大年之偕老徵

具慶之多。懽敬維

弧。悅交輝。

椿萱並茂。

笑博庭闈而舞綵。

祥凝海屋以添籌。引領

德門。既欣且抃。弟自愧塵勞不獲登堂申敬。私衷歉仄。莫



可言宣現已函囑舍間。屆期備呈祝禮。務祈  
不遺在遠。代陳

賜存爲感。專肅。祇賀

大禱。上請

侍安。

弟某某謹啓

月

日

○賀友人壽

某某仁兄惠鑒。遠睽

左右。迹阻神馳。頃聞月之某日。欣值

生申良辰。願獻

九如之頌。並陳

五福之嘽。恭維

壽字詳。慶

名楣。壽溢。

銘長生於無極。

喜難老而自由。跂望

懸弧。曷勝忭頌。弟情殷。就祝。跡阻。撫衣。忝在。案交。諒蒙

鑒諒。茲附呈菲敬一函。聊申賀悃。幸卽

晒收。是感。專肅。祇祝

崧盤。並請

台安。

弟某某謹啓

月

日

○賀友妻壽

某某仁兄閣下久違

雅範懷仰實深。日昨令親某君來此。述及月之某日。爲

嫂夫人設悅良辰。企

婺宿之溢輝。喜

海籌之增紀。

燕闈集慶。看繞膝以承歡。

鴻案凝祥。樂齊眉而偕老。驥覘

壽宇。欣頌奚如。弟本擬趨前稱祝。奉介一觴。乃以俗冗。不

能如願。抱歉良深。茲附呈微物數種。幸卽

賜存以博

筵前雙笑。至爲感荷。肅此祇賀

儷禧。並請

台安。

弟某某謹啓

月

日

○賀政界壽

某某先生執事。翹企

桴輝。時殷葵向。茲值

懸弧之大慶。彌欽

吉座之加榮。恭維

壽域長春。

福星永曜。

兜觥笑酌。迎曼祉而雲臻。

鶴算忻增。與勛華而日楸。

鴻儀引領。愧忭莫名。弟捧綬情殷。稱觴迹阻。敢用土儀率

獻。藉申一片芹衷。惟慙薄物無文。聊作

千年桃實。肅修蕪簡。祇祝

松齡敬請

助安伏乞

鑒

弟某某謹啓

月

日

○賀軍界壽

某某仁兄麾下久睽

英采良切欽遲喜逢

弧矢之佳辰彌仰

鈞樞之偉望恭維

祥凝細柳

春熟蟠桃

燕領雄奇名世兼能壽世

龐眉矍鑠將星真是福星翹景

崧生欣陳華祝弟心馳鞠臆身阻稱觴頌撫駢詞媿乏江

郎之筆願增

鶴算頻添海屋之籌。呈附微儀。上所  
笑納。專肅。祇叩

遐齡敬請

助安。

弟某某謹啓

月

日

○賀學界壽

某某先生左右。久違

芝範。時切葭思。茲聞月初某日。欣值

懸弧令旦。想

名流之崇拜。瞻

壽宇之臚。敬維

佳日徵祥。

德星集瑞。

南山君子。介兕觥而樂頌無疆。

東閣詩人。增鶴算而羣稱難老。

喬松引領。掄藻莫名。弟未遂摠衣。用陳賀簡。料此時

橫拖綠玉。倒誦黃庭。強健當有逾於曩昔者。下風洄溯。欣

羨奚如。附呈菲敬。幸卽

賜存爲荷。專肅祗祝

遐齡。並請

台安。

弟某某謹啓

月

日



○賀商界壽

某某仁兄大鑒。賤敬久疏。時殷仰系。茲聞某月某日。爲

閣下幾旬華誕。企

家庭之集慶。忻

壽考之維祺。恭維

名著鴻籌。

紀增鶴算。

方范蠡而生涯愈富。

比壺公則歲月偏長。

吉曜翹瞻。下風馳祝。弟摠衣未遂。賀簡特陳。附呈微敬。一

函聊以將意。卽祈

晒收。是所感幸。專此禱祝

千春。並請

台安。

弟某某謹啓

月

日

○賀完姻

某某仁兄左右。遠道懷人。

好音送喜。欣悉某月某日。爲吾

兄合巹佳辰。恭維

慶洽良緣。

歡言嘉禮。

人間二妙。諧好合於百年。

天上雙星。符昌期於五世。引瞻

百曜。欣頌奚如。弟遠隔一方。未能趨賀。下懷歉悵。莫可名

言。茲特附呈菲敬一函。即乞

晒存。是荷。專肅。祇賀

大禧。敬請

台安。

弟某某謹啓

月

日

○賀文明結婚

某某仁兄執事。渴思

雅教。忽聽

喜音。忻諗月之某日。與某某女士

文明結婚。敬維

嘉禮告成。

良緣迨吉。

昌期燕婉。締幸福於家庭。

儷祉駢蕃。標儀型於社會。遙瞻

吉宇。歡頌莫名。弟羈身異地。在遠情殷。趨賀未能。至爲悵

歎。茲特附呈菲敬。卽乞

飭存。禮數不周。尙希

鑒原。是幸。專肅祇賀。

大禧。卽請

台安。

弟某某謹啓

月

日

○賀續娶

某某仁兄左右。正企

鴻儀。忽傳

鵲報。欣聞月之某日。爲

閣下花燭良辰。敬維

鳳卜新諧。

鸞膠重續。

偕窺寶鏡。華妝正合華年。

喜賦玉臺佳耦定多佳話。

吉暉在望。懽頌莫名。弟以俗務羈身。不克趨前道賀。抱歉良深。謹具不腆之儀。聊以將意。務乞

哂存是幸。專肅。祇賀。

燕禧。卽請

儷安。

弟某某謹啓

月

日

○賀納寵

某某仁兄閣下。久隔

芝儀。苦思舊雨。忽承

蘭訊。喜詠小星。知傍

琴瑟而依依。宜抱衾裯而肅肅。

珠量聘價。權稱柳氏柳枝。

金屋藏嬌。迎到桃根桃葉。引瞻

台曜。欣賀奚如。弟愧羈塵勞。未獲趨前道喜。親覩新妝。至

以爲悵。茲特寄奉化裝品數事。藉佐香豔。尙乞

哂收。是荷。專此奉賀。並頌

潭祺。

弟某某謹啓

月 日

○賀娶媳

某某仁兄惠鑒。久別

芝顏。時深葭溯。頃聞某月某日。爲

某某世兄吉席。瞻

德儀之衍慶。喜

嘉禮之告成。敬維

瑞溢名楣。

芬垂式穀。

試聽雙聲於雛鳳。

訓吟三疊之關雎。遙企

華堂。無任欣頌。弟身爲事絆。不獲趨申燕賀。想可仰邀

鑒原。茲特寄呈菲敬一函。卽祈

莞存是荷。肅此祇賀。



大喜並請

台安。

弟某某謹啓

月

日

○賀娶孫媳

某某先生左右。遠隔

鴻楣。正殷鵠望。昨聞某月某日。欣逢

孫世兄完姻嘉禮。欽

德門之衍慶。企

吉曜之呈輝。恭維

謀喜燕貽。

兆諧鳳卜。

嗣徽音於兩世。頌洽百男。

訓詩始之三章。肇開萬福。

華堂引領。欣忭莫名。弟誼應趨賀。來附賓筵。緣事絆身。良

用歉悵。寄呈菲儀。將意卽乞。

笑而存之。肅此祇賀。

大喜敬請。

台安。

弟某某謹啓

月

日

○賀嫁女

某某仁兄閣下。久別。

台顏。彌殷洄溯。茲聞某月某日。欣逢。

女公子出閣良辰。仰

德門而翹企。知

嘉禮之多宜。敬維

選中雀屏。

占諧鳳卜。

詠桃華而迨吉。

喜冰玉以交輝。踐企

名楣。曷勝怵頌。弟因聞訊。略遲不及。備呈禮物。附上奩敬。

殊愧不恭。尚乞

警存是幸。專此祇賀。

大禧。卽請

台安。

弟某某謹啓

月

日

○賀生子

某某仁兄閣下。正思

舊雨。忽奉

朶雲。知

徵種玉之良因。已

得弄璋之大喜。

德能裕後。卜王郎不是凡兒。

慶自充閭。欣桓氏獲茲英物。仰瞻

吉字。曷馨頌忱。弟駒陰易擲。馬齒徒增。膝下猶虛。心期甚切。不知能如

君之一索得男。而天從人願否也。附寄冠履數種。聊以佐函。卽乞

哂納。是荷。專此祇賀大禧。敬請

儷安。

弟某某謹啓

月 日

○賀生孫

某某仁兄惠覽。遠睽

左右。跡阻神馳。昨聞

執事於是月之初。獲抱孫之喜。知

餘慶既徵。諸積善而

世德復見其作求。

瓜瓞延綿。忻看貽謀於燕翼。

蘭蓀早茁。定能繼武以象賢。遙企

名楣。曷勝忭頌。弟此時現狀尙佳。堪以告慰。惟兒輩雖已

讀書。猶未成立。以視吾

兄之含飴娛樂。豔羨奚如。茲附寄菲物數種。藉申遠忱。卽

乞

警收轉交。是所幸荷。專此祇賀。

大禧敬請

台安。

弟某某謹啓

月 日

○賀雙生

某某仁兄大鑒。久睽

教益。正切欽遲。頃聞吾

兄於上月中旬。獲有學生之喜。想見

熊羆旣徵。諸吉夢。

鳳鸞斯產。於同胞。

玉刻雙璋。忻瑤環之並秀。

錦挑對襪。看弧矢之交輝。引企

崇閩無任忻忭。弟上年幸得一男。尙有以爲民國添民相  
戲者。今吾

兄連舉兩雄。知有功於民國。更不待言。其亦

試聽英物之互啼。而自覺發矇否。附寄菲物數對。以佐荒  
函。至乞

警收爲荷。專此敬賀

大禧。卽請

儷安。

弟某某謹啓

月

日

○賀友人之子孫學校畢業

某某仁兄左右。別來數月。如隔三秋。每憶



清暉。時勞懷想。頃奉

惠教。忻諭

文郎孫

已在某某學校畢業。勤學積年。得茲良

果。逃聽之下。忭賀莫名。弟念學問之道。本無窮期。以

閣下培植之力量。既優。

文郎孫

進取之思想。更富。固宜出

洋留學。達到完全之目的。惟當此中德絕交。禍福未定之時。似應暫緩進行。姑出其所學。以造就社會之人材。

較爲有益。不知

閣下以爲然否。手此奉賀。敬頌

潭祉。

弟某某謹啓

月

日

○賀被選議員

某某先生執事。自違

道範。瞬已經年。正切心儀。忽傳

吉報。忻悉得。

選青於社會。將

建白於國家。從茲

代表民情。增益同胞之福利。行見

主張輿論。蜚聲立法之機關。引領

台暉。無任懼怍。弟年來跼伏。碌碌如恆。比之

公才公望。卓越一時。相去奚啻天壤。惟祈此後風便。時

賜教言。俾資磨礪。是所幸禱。專此奉賀。敬頌

近社。

弟某某謹啓

月 日

○賀商店開張

某某仁兄閣下。久未布候

起居。每於友好往還。藉問

安況。欣慰無量。頃聞

創設某某寶號。行將諏吉開張。企

駿業之恢宏。欽

鴻籌之展布。

指揮如意。樹特幟於商場。

遐邇馳名。擅雄賞而利市。臨風欣頌。羨佩莫名。弟一是如

常無善可述。以視

閣下之大啓規模。殊形見絀。暇時尙祈

不吝教言。俾資進益。至爲盼幸。附上賀禮。卽乞

晒收。專此敬賀

大喜。順請

台安。

弟某某謹啓

月

日

○賀新屋落成

某某仁兄左右。自遠

雅教。久未通函。懷企之忱。無時或釋。昨聞

執事經營華屋。刻將大慶落成。遙想

美奐美輪。

攸寧攸芋。

里名光化。好奠竹苞松茂之基。

宅號親仁。益增鳥革翬飛之象。引瞻

吉曜。欣頌莫名。弟情殷迹阻。未克趨申燕賀。藉仰

規模。良爲歉悵。附上聯幃。聊申祝忱。至乞

察收爲荷。肅此奉賀。

鴻禧。祇請

台安。

弟某某謹啓

月

日

○賀人遷居

某某仁兄閣下久別

光儀。思與時積。昨聞

芝楣新徙。

華屋卜居。

鶯擇喬遷。特請更乎爽垲。

燕來報喜。樂依傍於德鄰。引企

鳴呵。曷勝忭頌。弟本擬趨賀。

崇階。奉擾杯酒。奈因俗冗羈絆。良用悵然。附呈菲儀。卽乞

惠納爲荷。專此敬賀。

鴻禧順請。

台安。

弟某某謹啓

月

日

○賀人新年

某某先生閣下。敬肅者。律轉鴻鈞。一元復始。韶回鳳瑄。萬象

昭蘇。恭維

首祚迎祥。

履端肇慶。

太和在抱。總百度以維新。

景福來同。偕三陽而開泰。

吉暉在望。怵祝莫名。弟跡阻亮趨。情同雀躍。下風引領。愧

吟獻歲之詩。向日傾忱。喜上

宜春之頌。虔修寸啓。敬賀

年禧。祇請

台安。統希

賜啓。

弟某某謹啓

月

日

●通候類

○通候未會而神交者

某某先生閣下。久欽

駿望。莫挹

鴻儀。殷系寸丹。難宣尺素。敬維

鼎祺。綏燕。



履祉吉羊。引企

神交。無任忭頌。弟識等管窺。材慚薄植。每懷

塵席。識荆將卜於何時。遙盼

龍門。御李尙須乎他日。倘蒙

賜教。俾附

知音。庶如親

霽月光風。不致徒勞饑渴。且默契

高山流水。從茲快慰生平。專肅奉候。敬請

台安。

弟某某謹啓

月

日

○通候舊交而疏闊者

某某仁兄左右。久疏通訊。良以塵俗無可述告。忝在深知。必能原心略迹也。比維

台候增勝。

潭第多綏。定如所頌。弟此間僑寄。久擬言歸。無奈俗務絆牽。以致行期屢改。大約今歲又不能回里。而一敘闊懷。吾

兄近狀如何。至爲系念。尙希便中

賜示。以慰拳拳。專此奉候。祇請

台安。

弟某某謹啓

月

日

○通候新交而卽別者

某某仁兄閣下。獲挹

芝顏。備聆

蘭誨。客途傾蓋。頓成莫逆之交。旅次賦詩。遽話陽關之別。屈指

文旌。定回

珂里。敬泐魚書。特申燕頤。弟緣他事。耽誤旬餘。計將南旋。不料又爲含親挽留。幫辦局務。大約須至明春。始可再言旋歸也。知關

綺注。故特奉

聞。倘蒙

賜教。希卽寄交。舍親處是荷。專此奉布。卽請

近安。

弟某某謹啓

月

日

○晤後致函奉候

某某仁兄惠鑒。自親

芝範。良慰葵忱。比維

台候清娛。

動定多吉。允孚所頌。弟於上月別後。每一念及

執事之字量情文。輒覺繫懷而莫釋。且自幸愚陋無狀。竟

獲仰邀

垂青。感激之私。更有非楮墨所可形容者。惟祈此後

時賜教言發蒙祛鄙。俾可資以遵循。是所企禱。專此奉布。  
敬請

近安。

弟某某謹啓

月

日

○擬謁先行奉候

某某先生閣下。遠隔

台階。良殷翹企。敬維

興居晉吉。

潭第咸綏。爲頌爲慰。弟粟碌如恒。無狀可述。春初本擬溯

江而上。一謁

台端。旋因事阻。未克成行。近由某君某某。邀約同伴。前來

貴處調查某事。大約月初即可登程。屆時趨晤。傾談積愆。快何如之。叨在

舊契。故特奉

聞。專此布意。祇請

台安。

弟某某謹啓

月

日

○疏問道歉

某某仁兄閣下。自違

叔度。鄙吝復生。時序駸駸。忽更裘葛。比維

與居集嘏。

動定翔讖。定符肫頌。弟旰宵歷碌。自愧勞人。屢擬裁箋。通

候輒以俗務紛投。因而中輟。疏忽之咎。實所難辭。自問於衷。歉仄無似。聞

從者將有來茲之說。未知何時

命駕。益切驢瞻。尙祈

惠示數行。以便迎候。爲盼。專此奉布。祇請

台安。

弟某某謹啓

月

日

○失道道歉

某某仁兄左右。闊別

音塵。時勞夢縠。雖郵簡往來。情愫不隔。究無解於饑渴之忱。日前

台從光蒞辱荷

惠臨適弟因事赴杭未能把晤失逐之罪諒邀

鑒原惟是暮雲春樹久切瞻思乃不意

德輝遙賁仍不能一圖良覲其爲歉悵曷可名言俟及秋

初弟擬返里一行屆時定當便道趨謁以紓茲積悃也

專此奉布祇頌

近祉

弟某某謹啓

月

日

○覆候道歉

某某仁兄執事不親

光霽數月於茲方擬裁箋乃蒙



先惠就諗

因時納祐

卽事多忻。無任快慰。弟塵累如恒。乏善可述。尙幸賤軀粗

健。足以上紓

注垂。惟所宵歷。碌瑣務雜投。久未函候起居。至爲抱歉。承

示下月

駕蒞此間。約往某處一行。屆時弟當遵

命奉陪也。專此奉復。卽請

台安。

弟某某謹啓

月

日

○通候舊同事

某某仁兄閣下。相睽兩地。瞬已經年。每憶

清暉。不勝馳結。比諭

履祺集吉。

旅社增綏。爲頌爲慰。弟自別後。熱仍因人。困羈塵勞。無狀

可述。乃撫今溯昔。覺爾日意合情投之。

雅誼。真有令人惓惓不忘者。舊雨難逢。苔岑遙隔。感懷景

物。良覲何時想。

閣下亦必同此惓悵也。倘蒙

不棄。尙祈

惠賜數行。以慰懸系。專此奉布。祇請

台安。

弟某某謹啓

月

日

○通候舊居停

某某先生閣下。自違

台教。緜歷歲時。馳慕之忱。無時或釋。敬維

泰躬輯豫。

熙履延釐。爲頌且慰。弟溯睽

東道以來。一切尙稱安妥。惟自愧襍線之才。早荷

垂青之雅。五中銘鏤。不知報稱於何時。况及今迴憶。愈覺

前塵昔夢。莫可追尋。雖人生之離合無端。而賓

主之感情常在引瞻  
左右良用悵然偷蒙  
不棄尙祈

公暇賜教以慰拳拳專此奉候祇請  
台安

弟某某謹啓

月 日

● 詢問類

○函詢協約國採購軍糧是否有無限制  
某某仁兄閣下。一從睽

教。月增額更比惟

履社多嘉。至以爲頌。茲啓者。頃聞俄國此次革命。因麵包

缺乏。貧民衆多。而糧食問題。遂爲最近之導火線。蓋立國以人民生計爲本。而糧食爲人民養命之源。故其國之政治雖腐敗。官僚雖壓制。或猶可容忍於一時。若糧食缺乏。則生命攸關。須臾不能容忍。此俄之所以不革命於曩日。而獨革命於此時也。現在我國與協約國協議。曾有聽任採辦軍糧之說。此問題極有關係。究竟有無限制。可否履行。想吾

兄旅居京師。所聞較確。務希

詳示實在情形。至爲盼禱。專此奉布。祇請

台安。

弟某某謹啓

月

日

○致友詢問租界煙膏店是否一律禁絕

某某仁兄大鑒。積月未挹

音譚。願言曷已。比維

起居曼福。爲頌爲慰。茲啓者。今聞禁煙末日將屆。洋藥公所。已與法工部局接洽。所有法租界中之土商及煙膏店。行將永遠閉歇。未知公共租界。是否與法租界相提並行。尙祈

賜示近日實在情形。以解疑慮。蓋弟希望一律禁絕。必須得一確據。藉以傳告親友中之戀戀於此者。俾其勿生妄念也。專此奉布。順請

台安。

弟某某謹啓

月

日

○奉問政府與德斷交之意見

某某仁兄足下。自睽

眉宇。恆切心儀。比維

履祉。緝延如頌。以慰。茲啓者。頃聞政府與德斷交。已成事實。凡我人民。無不謂中國無靈敏手腕。無真實力量。并無四照之目光。墮入陰謀。強援盡絕。苟離中立兩字。卽成附庸小邦。故弟意以爲宜將彼力請加入戰團者。悉數驅令出境。聽其自赴前敵。俾遂壯志。勿得牽動全國。而貽笑萬世。惟又念政府諸公。祕密討論。已經多日。今

仍擬出於孤注一擲之途。究竟是何意見。無從探索。吾兄倘有確聞。務乞

賜示。以解疑團。是所盼禱。專此奉達。順請

近安。

弟某某謹啓

月

日

○函詢自流井之井火夜出奇光

某某仁兄左右。久闊

音儀。冗疏候問。比維

動履。緝吉。式叶企私。茲啓者。昨閱報載

貴處某自流井之火。不循軌道。噴高一百餘尺。遇陽火自燃。散漫天空。作晚霞色。旋作五采如電流。頃刻萬變。有



如陸地海市蜃樓。此種奇異。弟真聞所未聞。因念  
兄離該井不遠。想當

親眼見之。究竟此事之確實情形如何。務乞  
詳示其狀。以爲研究之資。是盼。專此順請

台安。

弟某某謹啓

月

日

○覆詢地丁附稅暫緩減免之理由

某某仁兄惠覽。奉披

手教。備荷

注存。卽請

動履。罄宜。無任欣慰。

來書詢及我鄉完納漕糧情形。現在無甚異議。惟弟意竊有不解者。我省地丁省附稅三角。前准省議會議決否認。卽經公布在案。迄今省署仍令照舊完納。是立法之規定。與行政之施行。兩不相符。而凡經議會表決者。豈非空言而無效。個中理由。究竟何在。尙希吾

兄賜教。以釋一般老百姓之疑。是幸。專此卽請  
近安。

弟某某謹啓

月 日

○詢問友人遷徙地址

某某仁兄足下。遠睽

左右。跡阻神馳。辰維

近祉增綏。定如所頌。弟上月卽擬函候起居。因聞

尊府業已遷居。恐作書無從投遞。必致闕誤。茲適有某友之便。用修數行。託其面交吾

兄。乞卽將地址

詳示。俾此後函件。可以逕寄也。弟現粗健如恒。合家均好。祈勿

垂念是盼。專此祇請

台安。

弟某某謹啓

月

日

○詢問友人何時回里

某某仁兄惠鑒。違

教月餘。思企何似。惟

起居住勝爲頌。茲啓者。我邑地方自治研究所。前由

足下熱心發起。倉猝成立。形式雖已粗具。而組織未能完備。至今該所如同虛設。並無自治研究之可言。務希

足下撥冗返里。整頓一切。以期實事求是。而力促進行。好在交通甚便。往來可以自由。

台旃何日言旋。即乞

示知是盼。專此順請

台安。

弟某某謹啓

月 日

○函詢物品價值

某某仁兄足下。憶自春間握別。轉瞬忽已秋初矣。每懷

丰采。無日不神馳

左右也。卽維

履祺迪吉。

旅祉增綏。定如所頌。茲啓者。刻聞

貴埠某廠。新出各種花呢。價廉物美。頗合服用之宜。擬託

足下擇其顏色合時者。代購兩疋。以備舍間分用。需價若

干。希卽

賜示。其款或卽撥付。府上。抑匯寄

尊處并祈

酌定以便遵行。有費

清神容當面謝。專此奉託。祇請

近安。

弟某某謹啓

月

日

○探問家鄉年歲豐歉

某某仁兄閣下。久疏函候。企念爲勞。辰維

台履增綏。

潭庭協吉。良如所頌。茲啓者。弟閱報載我鄉苦旱之情形。寸衷不勝焦慮。蓋關於弟個人之租入者。猶小而關於地方養命之源者。甚大。究竟目下之現狀如何。將來之

歉收奚若。務乞吾

兄。詐示實情。以慰遠系。如果災象已成。確無希望。則弟前  
茲返里之說。當亦作罷論矣。專此奉布。祇請

近安。

弟某某謹啓

月

日

○詢問友人之子已否訂婚

某某仁兄左右。久睽

台教。時切瞻思。比維

起居勝常。

公私順適。定符肫頌。茲啓者。弟有友人某君某某。曾見

世兄校中課藝。嘉賞不置。并云。世兄如未訂姻。當託

弟爲其小妹作伐。弟思某君家庭極其整肅。且聞渠小  
妹肄業某校。成績頗優。如果由弟介紹。完成美滿姻緣。  
亦一時之佳話也。倘蒙

許可。卽祈

惠賜復音。以便轉達。專此祇請

大安。

弟某某謹啓

月

日

### ●請託類

○請友蒞會

某某先生賜鑒。敬啓者。本會自發起以來。贊成者日衆。現已  
達五百餘人。定於某日某時。在某處開成立大會。早經



登報廣告。惟事關創始。非得素負時望者。左右其間。不足堅社會之信仰。

閣下恢復共和。功在民國。天下顛顛。想望

丰采。使趁此時機。得遂先覩爲快之心。則已入會者。羣忻

親接

光儀。而來賓席中。亦必思附

驥尾。以爲榮。故特專函上懇

台駕。務祈屆期

惠臨。是所至禱。專此奉請。祇頌

鈞祉。

弟某某謹啓

月

日

○請友入黨

某某君鑒。敬啓者。弟等爲監督政府。促進共和計。因有某某黨之組織。設事務所於某處。成立以來。信從日衆。現已及一千餘人。不可謂不發達。然欲求確有政見。可與謀國家事者。實不數數觀。弟等素仰

閣下宗旨。與本黨相同。倘荷

贊成。則若綱在綱。若舟得舵。愈可規定趨向。且會中人。雖無政見之可言。而熱心殊甚。誠得

執事迎其機而利用之。安知不化腐朽爲神奇。故特專函

奉請

惠臨。并希卽

賜教言是盼。專肅。祇頌

台祉。

弟某某等謹啓

月 日

○請友發起追悼會

某某仁兄執事。敬啓者。共和復活。飲水思源。因有追悼死難諸先烈之盛典。如某省某州等役。業已次第舉行。懦立頑廉。誠足令人興起。惟某處一戰。實爲扼要之圖。死事亦最烈。表揚盛德。迄付缺如。在死者對於鼎鑊刀鋸。原自行取義成仁之素。在生者對於旂常竹帛。安可無報功崇德之心。務祈

大力發起。開會追悼。以表彰義烈。庶不致效忠民國者。聞而氣沮也。專此奉布。祇頌。

台祉。

弟某某謹啓

月

日

○請友作證婚人

某某先生執事前聆

大教。快慰積衷。比想

道履安和。定符景仰。茲敬啓者。小兒某某擇於是月某日。

與某某女士文明結婚。擬請

執事爲主嘉禮。以昭鄭重。忝在

愛末。想不以煩瀆見辭。除具柬恭請外。用再函達。務祈屆

時

惠臨禮堂。

寵頒訓語。以資證守。而定婚儀。不勝感幸之至。專肅奉懇。

祇頌

台祉。

弟某某謹啓

月 日

○託友爲子擇婦

某某仁兄賜覽。自違

台教。忽又月餘。每念

起居。至爲悵仰。茲有懇者。小兒某某。頃在某校畢業。將來或可稍有希望。惟年已弱冠。亟思爲之完姻。以了向平。

之願。茲特奉託

台端。乞代物色。祇須性情純淑。能持家政者。卽爲合格。其他并無奢願。倘

閣下親友中有可以擇配者。卽祈

俯賜執柯。特

愛請求。希勿以冒瀆

見辭是幸。肅此懇託。祇頌

近祉。

弟某某謹啓

月

日

○託友購置房屋

某某仁兄台覽。不通尺素者數月。思念之深。與時俱積矣。比

想

興居康勝。

潭第安佳。欣頌無極。茲啓者。弟年來薄有積蓄。擬爲未雨綢繆之計。遂蹈求田問舍之譏。吾邑如有相當房屋。尙祈我

兄代爲留心。以便及時購置。好在弟意並不求其華美。祇須空氣清暢。卽依山面水。近郭之處亦佳。果能如願以償。則他年優游林下。歲時伏臘。得與舊日朋輩。把酒言歡。至足樂也。專此奉託。祇請

台安。

弟某某謹啓

月 日

○託友代覓古董

某某仁兄左右。久未函候。馳念殊殷。比維

餐衛咸宜。爲頌爲慰。茲啓者。近聞京師時有前清內府古董物件。出現於肆。華人不甚關心。輒爲碧眼兒。木屐商。以賤價購之而去。至爲可惜。此後遇有書畫磁銅等舊物。價苟相宜。務乞

代爲留意。弟非有餘力。以爲此舉。不過欲於明窗淨几旁。安排數事。時一披覽。時一摩挲。不特令人望古遙集。且以盡區區保存國粹之心。惟質鼎孔多。尙祈詳加評鑒爲幸。專此奉託。卽請



台安。

弟某某謹啓

月 日

○託友代求書畫

某某仁兄左右。久違

芝字。時切葭思。比維

起居健勝。慰如所頌。茲啓者。弟生平別無嗜好。惟對於有名書畫。未脫書生習氣。偶一見之。不惜輾轉請求。必償私願而後快。日前過友人齋。見懸有某君某某所書屏聯。如渾金璞玉。逼真石庵。某君某某所繪翎毛花卉。立幅。姿勢生動。不讓南田。知爲必傳之作。實深健羨。頃探悉二君均與

執事爲莫逆交。不勝狂喜。用特奉上賤紙若干幅。務乞並爲代求。魚與熊掌。竟思兼得。自知貪心過甚。然以高渤海之神勇。當不難一射雙雕也。專此奉託。祇請近安。

弟某某謹啓

月 日

○託友代請律師

某某仁兄惠鑒。昨奉

手書承

詢訟事情形。感愧交并。弟與某某交涉興訟。本係平常民事。萬無受名譽刑之理由。乃承審員竟受運動。將弟羈留。并判決剝奪公權。憤懣之懷。莫可言喻。務乞

閣下代請精研法學之律師。前往上訴。庶不白之冤。或可昭雪。事在急切。懇勿耽延。是所至禱。專此奉託。敬請

台祉。

弟某某謹啓

月 日

○託友代請醫生

某某仁兄閣下。不聆

鑿教。匝月於茲。

室邇人遙。時深渴望。弟於前日忽遭河魚之疾。委頓床第。煩苦莫名。家人延請西醫。毫未見效。茲悉某某先生。青囊妙術。名重一時。聞

閣下與伊素相知交。懇即

費神代爲邀請。臨舍俾呻吟者得起。沈疴則感激靡既矣。  
手此奉託。祇頌

台祉。

弟某某謹啓

月

日

●引薦類

○引新相知

某某仁兄惠鑒。積日未能趨領

教言。至以爲念。茲有敝友某君某某者。係某處人。技能甚  
佳。性亦謹厚。聞前曾與吾

兄遇於京華。頗覺相見之恨晚。現賦閑居。甚無聊賴。因悉  
貴省鐵路公司倚重

高賢主任一切。擬圖鷓借。深慙冒昧。囑爲先容。倘蒙推愛。於分局各職務中。

量爲位置。斯一識。

韓荆州。卽如封萬戶侯。感激當如何也。是否卽請賜覆。是盼。專此順頌。

台祉。

弟某某謹啓

月 日

○引舊相識

某某君鑒。前承

惠顧劇談。欣甚。奈因陰雨連朝。迄未報謁。引爲深歉。茲有姓某名某某者。吾輩十年前舊交也。衣冠樸素。談論縱

橫。昨日見訪。與談往事。令人聽之忘倦。提及

執事。彌深向往。惟以

雲泥分隔爲嫌。且恐被閹者所拒。用特予以寸函。作爲介紹。俾不至

門有留竇。而容其抵掌華屋。想

傾耳之餘。較溫舊書一過。當尤愉快也。此上祇頌

日祉。

弟某某謹啓

月

日

○引遠親而亟求援繫者

某某仁兄左右。不領

教言者。已月餘矣。屢擬趨候

興居輒爲事阻。想念之忱。無時能已。茲有某君某某。係弟之總角交。新自故鄉來。屬爲謀事。其實自願不暇。何能助力。因思渠與

閣下確屬葭莩。惟世系略遠。以致不相聞問。而弟則知之有素。故特予以寸楮。囑其自詣

台端。面求援繫。想

尊處規模宏大。當可設法位置也。專此奉懇。祇頌

近祉。

弟某某謹啓

月

日

○引本家而素未謀而者

某某仁兄大鑒。逕啓者。弟前在某省。遇

貴本家而僑寓者。細詢家世。知與

閣下爲從昆弟行。曾緬述之。想猶

耳熟能詳也。乃渠昨到此間。卽行過訪。談及此事。因素未  
謀面。囑爲介紹。弟本擬同來。適有要事。不克如願。因特  
予以尺素。作爲先容。想聚千里於一堂。話先人之舊德。  
其愉快當何似也。專此奉陳。卽頌

台祉。

弟某某謹啓

月 日

○引錯怪而願負荆請罪者

某某先生左右。敬啓者。前聞

閣下與某君某某。意見甚深。其實皆因公事上衝突。並非



個人私憾。弟早悉其內容。昨日某君過談。細詰理由。始知出於種種誤會。因將

閣下之所以然。及不得不然之故。仔細指陳。渠乃恍然大悟。悔媿交并。幾於無地自容。當即准於明日來

前請罪。囑先代爲致意。弟想廉蔭交懽。豔稱千古。務祈閣下盡釋前嫌。不使秦庭歸璧者之獨享佳名也。是幸。專此奉陳。祇頌。

台祉。

弟某某謹啓

月

日

○薦會計

某某仁兄如握。前茲返里小住。暢領

教言。別來彈指光陰。又將匝月。遙想

履祉安和。爲頌。茲啓者。頃聞

貴公司開辦在卽。而出納之司。知必謀夫孔多。倘此席刻

猶虛懸。弟有敝友某君某某。擬卽引薦

尊處。勉力效勞。其人素以廉隅自飭。絕無嗜好。寫算亦復

精明。

委以重寄。必能力謀公益。不顧私圖。倘蒙

推情延訂。弟當另覓殷實商號擔保。事關團體。必不使

閣下一人爲難也。是否卽乞

賜覆是盼。專此奉達。順請

台安。

弟某某謹啓

月

日

○薦書記

某某仁兄閣下。不晤

大教。忽忽月餘。一日三秋。思何能已。近諭

起居安適。公私勝常。爲頌爲念。茲啓者。昨晤某君某某。知

執事現擬添一書記。幫理文牘。尙未得人。弟有敝友某君

某某。向在某處襄辦筆墨。頗能曲折。一如人意。其人亦

和藹可親。毫無脾氣。現正閑居。擬圖枝借。倘蒙

推愛。延訂。弟當囑卽束裝來

前。供任職務。倘有他處。均請由弟擔保。是否卽祈

賜覆爲盼。專此奉布。祇請

台安。

弟某某謹啓

月

日

○薦西醫

某某仁兄惠鑒。旬餘未遑趨候。不知近日

貴恙。曾能起色否。至爲懸念。吾

兄平日談及治療技術。恆趨重於中醫。蓋見夫擁有微資者。偶然感冒。所延醫士。非泰西卽東洋。醫資藥費。恆千百倍於中國。而其人是否名家。抑亦市上懸壺者流。實難確悉。此誠不可不慎重出之。惟

閣下之病。中醫如難見效。似不妨權延西醫一試。現有某

君某某。曾經留學外國醫院。領有畢業文憑。於中國醫理。亦多心得。處弟擬作曹邱如荷。

贊成。當爲延致。好在某君醫金。可以隨意奉送。並不較量也。專此布意。祇請

痊安。

弟某某謹啓

月

日

○薦西法畫者

某某仁兄大鑒。久未趨談。思與時積。近維

動止咸宜。爲頌。弟昨晤某君某某。得悉

執事組織某某舞臺。將次成立。并聞需用之各種畫片。擬倩日人包辦。因索價過昂。尙議而未就。鄙意以爲區區

美術似不必求之鄰邦。以致我國金錢外溢。而爲漏卮之一端。茲有某君某某。於此道向推能手。西法尤爲擅長。所繪山水。頗有尺幅千里之勢。大約予以半價。即可限日取件。倘蒙

允准介紹。當卽屬其趨前。面議一切。是否務祈惠復是盼。專此順請

台安。

弟某某謹啓

月

日

○薦華工程師

某某仁兄執事。日前接奉

惠畢承

託代覓華工程師。足見

閣下注重我國人才之盛意。蓋建築技能。中法不及西法。固無庸諱言。然通商各埠。曾有耳濡目染。積漸成爲專家者。亦有留學外洋。畢業於工科者。苟能注意羅致。此中固大有人在。何必虛糜倍蓰之辛金。以延聘外人。而仰其鼻息也。現弟有同鄉某某者。承辦工程多處。甚有閱歷。以之應

命。或可勝任而愉快。昨已函約於某某日趨前親承

指示。倘蒙

推情錄用。應需保證。照章遵辦可也。專此奉覆。祇頌

台祉。

弟某某謹啓

月 日

○薦陸軍教習

某某先生鈞鑒。敬啓者。頃聞

執事整頓陸軍學校。決計改用華教習。至爲欽佩。蓋陸軍之改習洋操。盛於亡清末造。其時事屬創始。不能不借材異國。然所習者形式。未足以語精神也。粵教逢蒙射。逢蒙殺羿。西人何厚於華人。而肯預樹之敵。且一學校之成立。無不謂經費支絀。乃聘用一二洋教習。辛金騰



資代價極鉅。開支耗費莫此爲甚。弟現有敝友某君某某者。係日本陸軍學校畢業生。剛於前月學成返國。或可薦膺此選。倘荷

推情延聘。不特金錢免致外溢。且可使出其所學。力爲祖國謀幸福。當較聘用洋教習。更有裨益也。肅此奉陳。祇頌

台祉。並盼

賜覆。

弟某某謹啓

月

日

●規勸類

○規友人宜戒狎邪

某某仁兄惠鑒。不親

眉宇。數月於茲。比想

起居多吉。爲慰。近聞

足下留戀溫柔鄉中人。凡在知交。多以愛惜身名相規勸。而弟之鄙見。則更有進於此者。蓋女閭之制。始於管子。流毒至今。未能或已。乃說者謂給以金錢。供我娛玩。決無罪過。且不如此。是令此輩無噉飯之處。豈知彼果無利可圖。斯楚館秦樓。自絕跡於天壤。否則人競揮霍。以爲豪。一般鴿婦龜奴。方且羅致香豔。以恃爲生涯。而深閨弱質。相率而陷入火坑者。不啻恒河沙數。其罪過究

將誰歸吾

兄素重人道主義。何亦蹈紈袴所爲。尙希力爲戒之。是幸。專此布意。卽請

台安。

弟某某謹啓

月

日

○規友人宜戒賭博

某某君台鑒。許久不晤。至以爲念。頃聞

足下連日作竹園之遊。足見朋輩應酬。

清興不惡。然弟謂賭博一事。人情莫不惡輸而好贏。如其惡輸也。擲黃金於虛牝。何如周濟孤寒。饋贈親友。或且稱頌感佩之不遑。如其好贏也。暫時聚首。必使人倒篋。

傾囊而後已。心將何以自安。况有輸無贏。以此蕩產傾家者。實居多數。而失業廢時。猶爲餘事。尙祈足下亟自猛省。勿貽後悔爲幸。專此奉布。祇頌

近祉。

弟某某謹啓

月

日

○規友人宜戒酗飲

某某仁兄惠鑒。逕啓者。酒以合歡。亦以成禮。故酬酢之文。古人不廢。惟每見

執事興之所發。搢戰無休。一若不盡。人塑成泥。菩薩不快者。不知好勝之心。人所同具。助以酒力。迷憫益深。彼此爭強。終歸兩敗。一至嘔吐狼藉。斯身體之受傷必多。且

親朋相對。以叫囂強迫出之。既失雅觀。更成虐政。小則使人委頓不堪。甚則或爲罵座灌夫。或爲攘臂馮婦。以成禮始。以失禮終。以合歡來。以失歡去。反不若永除嘉賓。燕樂之爲愈也。吾

兄素稱明達。諒亦早見及此。尙希節飲自衛。是禱。專此奉布。祇頌

台祉。

弟某某謹啓

月

日

○規友人宜戒遊夜花園

某某仁兄惠覽昨承

惠招。偕遊夜花園。本當奉陪。然鄙意竊不贊成。非矯情也。

蓋我人出作入息自有定時。如謂夏夜苦熱不易成眠。則梧桐庭院。新月一鉤。品竹彈絲。亦足自樂。若必徵逐於曠野荒園。雖敗俗傷風之事。吾輩固可無慮。而夜深多露。恐非衛生所宜。且窗戶洞開。僮僕延佇。種種未便。楮墨難宣。或偶一爲之。猶可謂爲

雅人深致。倘竟樂此不疲。殊無足取也。

足下苟以弟言爲是。尙祈

另圖雅遊之所。是幸。專此奉布。祇頌

台祉。

弟某某謹啓

月

日

○勸友人務盡孝道

某某仁兄惠鑒。昨晤令親某某君。暢談之下。得悉吾

兄天性純篤。不事虛文。而菽水承歡。悉本真意。欽佩之深。匪言能喻。蓋自歐風東漸以來。遂有破壞家族主義者。藉口西人子女一經成立。卽與父母異居之觀。而慈孝大防。幾可盡撤。夫豈知西人家庭教育。務使子女幼年。便富於自治力。不至稍有依賴根性。卽愛之能勿勞乎。之意。非尋常人所能夢見。至其篤於愛親。如火山報仇錄。英孝子萬里尋親記。諸小說事實。以視中國二十四孝中人。亦無多讓也。我國倫紀。亟待整飭之時。誠得足下革澆風而厲薄俗。名教幸甚。民國幸甚。專此奉布。順

頌

侍社

弟某某謹啓

月

日

○勸友人務盡弟道

某某仁兄台鑒。昨晤令兄。知近日

賢昆季中。稍有違言。鄙意甚不謂然。我國自習染歐化以來。一般新人物。動輒呼中國四萬萬人爲同胞。及至觀其對待親生兄弟之間。反覺情狀參商。一若非同胞者。然蓋厚其所薄。而薄其所厚。猶且好借同胞二字。作口頭禪。未免爲識者所訕笑。吾

兄天性純篤。想不至如新人物之行爲。然必恭必敬。實爲



弟道所宜然。尙希

足下尊尊親親。以造家庭之幸福。是所切禱。專此布意。卽

頌

近祺。

弟某某謹啓

月 日

○勸友人夫婦諧好

某某仁兄左右。頃聞

足下與 尊闈以口角微嫌。行將負氣他往。弟竊以爲不可。蓋吾

兄伉儷之情。素來篤摯。卽或一時言語之間。稍有齟齬。亦不過瑟琴偶戾。並非切齒之仇。何必遠離家庭。致招外

人譏讓。况

老伯母晚年睹茲情狀。豈不愈覺感傷。尙祈  
足下立釋前嫌。言歸靜好。以圖一室之雍和。而上慰  
萱闈之廬念。是所至禱。專此布意。祇頌

近祉。

弟某某謹啓

月

日

○勸友人改用國貨

某某仁兄左右。昨日奉訪。見

貴寓中種種陳設。五光十彩。眩人眼簾。其實皆舶來品。無  
一中國貨。弟竊爲不取。夫洋貨充斥。至於今日。幾乎無  
人不有。無地不有。獨一人斤斤焉。欲保全國貨。似無增

損於毫末。然少一人用國貨。即多一人用洋貨。少一人用洋貨。即多一人用國貨。此理至易明決。况

閣下鴻名碩德。久爲物望所歸。苟能

熱心提倡。久而久之。安知不由一人推而至於百千萬億人乎。弟爲此言。非僅關個人財政問題。尙祈

閣下勿視爲日用尋常。而淡漠視之。是幸。專此布意。祇頌台祉。

弟某某謹啓

月

日

○勸友人購公債票

某某仁兄台鑒。昨聆

大教。謂中國銀行。素無信用。不如存放外國銀行。獲息雖

少而魂夢胥安。

遠慮深謀。至爲欽佩。然有中國存在。凡今日貯款外國銀行者。將來尙爲吾人之儲蓄。使無中國存在。則今日貯款外國銀行者。將來卽爲異族之私囊。試觀已往之覆亡諸國。便覺前車可鑒。故弟勸

執事多購公債票。非爲保國計。實爲保家計。蓋國苟不存。家於何有。國家存亡。匹夫有責。務望  
挹彼注茲。以保國家。是幸。專此布臆。祇頌

近祉。

弟某某謹啓

月

日

○勸友毋拘忌陰陽

某某仁兄大鑒。近聞

足下。凡事舉動。必詳究陰陽學理。甚善甚善。雖然。陰陽之說。不外乎天文。乃近今天文家言。各行星距離地球。不知相去幾千萬里。則非神道所可附麗。已昭然若揭。而舊日之星學家。動曰某日值某星宜某事。某日值某星不宜某事。何以造屋擇吉日者。仍有焚燬坍塌。結婚擇吉日者。仍有孤寡離異。且同日出行。而災祥互異。同日作事。而禍福不同。其理由究何在也。尙希足下事求其實。勿如世俗之拘忌。是幸。此上。卽頌

台祉。

弟某某謹啓

月 日